

**Lologena Wo Kiena Ne
Yesu Kristo Naña
MAK
Siriyuia
Visayuena Na Tusi Nene**

Komþasnen suniena plas na tusi nini

Tusi nini, “*Lologena Wo Kiena Ne Yesu Kristo Naña Mak Siriyuia*”, naga siari e visena tai naña sape lologena wo nene, naga lologena wo kiena Yesu Kristo, narina Ntewa. Mak kilologia naña Yesu pe yaru na yuñæena kiena ne Ntewa, a kiena visena m̃areraena sike ea. Tekilia tevisu kiena m̃areraena pogos naña piyan ke yeririna lala, a m̃eneplan m̃ena yermare lala, a naña warplan milamulena viowa kiena yaru lala. Yesu pisawal kiena kia tai, sape naga Narina Yeririna, naña naga pimin tam̃an kiena maliena vena warplanen milamulena viowa kiena yaru lala, vena akilia aure matan nalogeviowaena, yepela melala.

Mak pisayu manene yuñæena kiena Yesu pa laa sane, amio kile lala naña naga myuñæenia, taulu naña pisayu kiena visena lala.

E tusi nini, Mak pisayu þesan Yoane Nakeena amio kiena yuñæena, a naña Yoane kee Yesu. Siraunia, pisayu naña Yermare taþali Yesu. A siraun m̃ena suniena plas na visena nene, naga pisayu yuñæena kiena Yesu la narui naña kila ruru yaru la naña amai apimi apowo sina a naña

naga piyan ke yeririna lala. Pogos naña Yesu kila kiena yuũaena lala, silaga kiena nalogena la asumã akilia ruru naga amio kiena ðelaga lala pa laa sanene.

Ana e pogos nene, yaru lañas pe akekaran re Yesu poli, sinela kar Yesu pañisi. Marana na maro la na tusi nini apisayu malena kiena ne Yesu e kiena legiana olua na maro e yomarava nini, a pupia suri naña pisayuia, nane kiena marena, a naña mali sina.

E marana na keviu 16, yaru moki asitom asape Mak naga siri tusi nene tol ga marana na ve tokaki orelu, ana marana na ve tokaki la ne siraun nene, pona yaru tañena naga siria yo.

Komþasnen suniena la naña sike e tusi nini
 Yuũaena kiena Yoane Nakeena 1:1-13
 Yuũaena kiena Yesu garu Kalele 1:14—9:50
 Yesu molue Kalele pa Yerusalem 10:1-52
 Legiana olua na maro kiena Yesu naña kila kiena yuũaena Yerusalem, a yo make la naña lavisin Yerusalem 11:1—15:47
 Yesu mal sina 16:1-8
 Yesu pimi mǎlavin kiena nalogena lala a naga pa mae peni 16:9-20

Yoane Nakeena sike e yokorena pisawal ke visena kiena ne Ntewa

¹ Na nene Lologena Wo kiena Yesu Kristo naña narina Ntewa.

² Suniena na Lologena Wo nini siar e Yoane Nakeena, sa naña Visena Wa kiena ne Ntewa pisayu naga konua rui e visena tai naña Navisawalena Aisea pisawalia, naña Ntewa pisa pisape

“Naga pe yaru tai nalologonen kiau visena, naña namligan naga sumon ko, pe na kilaruruen mrapa lala kionã mekiki ruru wo. Mal 3:1

³ *Ana naga suña piovion ke e yokorena, piovion ke pisa ke pisape*

‘Amiu na monar akila ruru mrapa lala kiena Suñe Ntewa, amesmes ruru wo,

vena naga kilia yali ea imi kate e kiamiu malena lala.’ ” Ais 40:3

⁴ Sanene narui, Yoane Nakeena pimi kate e yokorena lepas naña Yutea, ana mlologon ke visena kiena ne Ntewa pan yeririna lala. Naga pisawal ke pan la pisape “Amiu monar avilopu amiu e kiamiu mlamulena viowa lala, aimi, vena nekee amiu e wii nakeena, ãisi na Ntewa viewo amiunia.”

⁵ Ana ãisi na yeririna la moki nae Yerusalem amio nae pulkumali tañena e lepas naña Yutea, la apa amiyagogan Yoane, ana la apisa plan ke kiela naviowaena lala pania, ana naga kee la e wii naña Yortan.

⁶ Ana pogos naña Yoane Nakeena sike e yokorena sanene, naga kila sa ga yermarua navisawalena tai na konua rui naña Elaisa, sa naña pe miyen re kulsota la naña po poli, ana mñana kulkota ape ga e vilulus nen sur mali tai naña kiena kia kamel, ana kulka na mñeña amiyumñan e narin kulus nen puluk tai. A kana kinanena e yokorena nene, naga kurpo ga ne amio kopululus nen lago na yomãrua, naña kiki sane purutevi.

⁷ Ana pisaar pan yeririna lala, pisa pisape “Pisi na yar tai, naña puriyuna mñarera taulunu,

naga yoko siraun inu imi. Yar nene, naga to laa metavan inu, in na pe netorokin re poli naña neulounia neyen plan kiena kulus nen lana, pona nekila si yumaen tai ne sanene vania.

⁸ In na nesuñña nekee amiu e ga e wii, ana yoko naga kee amiu e Ninuna Wa.”

Yoane kee Yesu

Matiu 3:13-17; Luk 3:21-22

⁹ Ana Yesu mligan pulkumali naña Nasaret, e lepas naña Kalele, pimi e lepas naña wii nae Yortan, ana Yoane kee e wii nene.

¹⁰ Ana pogos naña kee pae Yesu, Yesu suññalu, molue e wii pa metava, ana veraga ga ma e peni pietava pania, naga ñal Ninuna ne Ntewa pitomi ke tano sa ga manu naña lomñe, pitomi mesmes ga koan te naga.

¹¹ Ana lala amloge Ntewa nae ma e peni pis pitomi, pisape “Ko, ko ga taaga ope naruu wawa, ana nepinaia ko pañisi. Sineu si ko, nekekaran ko pañisi.”

Yermare tañali Yesu

¹² Ana e pogos ña ke nene, Ninuna Wa ãere Yesu naga taaga pa laa perina sane e yokorena,

¹³ ana Yesu suñña e nene tol legiena lualima yam vari, naña Yermare tañali naga pañisi. Yesu sike amio sur mal tetan lala e lele nene, ana navisi kiena ne Ntewa lala apimi apisuar ke naga.

Yesu siar kiena yuññaena garo Kalele

Matiu 4:12-17; Luk 4:14-15

¹⁴ Ana siraunia, apim atarar Yoane Nakeena, aþere pa akotawea e yuñã naloge viowaena. Ana pogos naþa Yesu mloge lologena nene, petan yo þasuþe pato si lepas naþa Kalele, ana siar e pogos nene, naga mlologon Lologena Wo kiena ne Ntewa.

¹⁵ Ana pogos naþa naga mlologon ke, pisa ke sape “Nanagane na, Ntewa kilia sane pe pog memes naþa monar avilopu amiu narui. Navesuþenena kiena ne Ntewa naga pimi ke pun amiu narui, monar avilopu amiu, alelaga e Lologena Wo nini.”

Yesu pio yar na wereen ika la vari

¹⁶ Ana siraunia, Yesu naga sumã mialoro ke e is nen pupia lapa nae Kalele, mñal yaru la lua nawereen ika, nane Saemon amio wenla Antru, lalua asuñã aþere ke kiela lilivi.

¹⁷ Ana Yesu pisa pan la, pisape “Amiu lua aim atavevenu. Yoko nekila amiu ave li nawereen yeririna lala aim ave kiau.”

¹⁸ Ana veraga ga lalua nene amligan kiela lilivi lala, ataveve Yesu.

¹⁹ Ana Yesu mial pali laa sane, kirawal narina ne Sepeti la luoka, nane Semes amio wenla naþa Yoane. Lalua atotano ke e pulus nen kiela waa, akila ruru ke kiela lilivi lala.

²⁰ Ana pogos naþa Yesu kirawal lalua nene, pio la, vena la mñena ataveve naga, ana asuñalu, amligan arimala Sepeti naga mñeke e waa amio kiena yaru nayuñãena lala, lalua ataveve Yesu.

*Yesu pilelua ninuna viowa tai
Luk 4:31-37*

²¹ Ana Yesu amio kiena yaru lala amial apa atol pulkumali naña Kapeneam, ana e Legiena Wa, apa e yuña nalotena, ana Yesu naga pian yeririna lala e Visena Wa kiena ne Ntewa.

²² Ana la naña amiyagogania amilan pañisi, komin naña amloge navianena kiena ne Yesu naga pe tañena, pe sa re navianena kiena ne kiela navianena la poli, komin Yesu naga kiena urmi po, puriukawaena kiena ne Ntewa teke ea.

²³ Ana e pogos nene, yaru tai naña ninuna viowa teke e naga sike amio la,

²⁴ kila yar nene, naga mãmãaga kare ga pañisi, naga pis pa Yesu, pisape “?Yesu nae Nasaret, kioña ya ne teke e imimi? !Po ko na opimin osape okila kare imimi! In na nekilia ko pa rui, ko na ope Yar Nowo Wa kiena ne Ntewa.”

²⁵ Ana Yesu pis mārera pan ninuna viowa nañane, pialuñar pania, pisape “!E, ko na ve ovis re! !Oure vetan yar nene nanagane ga ne!”

²⁶ Ana ninuna viowa nañane kila yepen yar nene miokamarmare, m̃aaga keviu yam si tai, ñisi na molue petania pure pano.

²⁷ Ana yar la nae yo nene amilan sur nene pañisi, asuña apisasayu ke Yesu, asape “?E, sanape na sanene? ?Navianena viu si tai nene, pona yar ne? Yar nene, naga puriuna kawa pañisi ne, pis ga pan ninuna viowa lala, ana amlogearia.”

²⁸ Ana komin sur ne la nanene narui, akekaranja, apisa ruru kia wo kiena Yesu pa e yo lala pa ãar punu yo punu ga e lepas nae Kalele.

Yesu kila ruru anenane wona Saemon Pita, amio yeririna taãena si laãasia

Matiu 8:14-15; Luk 4:38-39

²⁹ Ana Yesu amio yaru ne la nini, Semes amio Yoane, a Saemon amio Antru, lala amolue petan yuãna na lotena, apa e yuãna ãana ne lalua nene Saemon amio Antru, nanene e pulkumali ãa ke ga naãa Kapeneam.

³⁰ Ana e uãna ãana lalua nene, anenane wona Saemon naga mai ãeke ea, yepena pisuus, momalio ke e ãana tog, ana lalua apisawal pa Yesu.

³¹ Ana Yesu pa tarar limana sira marua nene, tarlua toãalu e ãana tog, ana yepena pimi manin sina, naga suãalu, pa piran kala kap.

³² Ana e ãa nena e legiena nene ko yepekilavi, pogos naãa Legiena Wa ãarovia, sane mrae pito kovio pa rui, yeririna lala aãure yar la naãa amai, a la naãa yermare la asike e la, apim pu Yesu,

³³ ana la moki manene la, sa naãa lavisi la punu ga nae kumali nene apim asuãalu e mratava na yuãna nene.

³⁴ Ana Yesu kila ruru yeririna la moki naãa amain inanena taãena lala, a ãene plan yermare la moki petan yar lala, pisawo yermare lala sape ve avisa re si sur tai, komin akilia pa rui sane naga pe Navisaarena kemua lelaga kiena ne Ntewa.

Yesu mlologon ke e yo lala lepas nae Kalele

Luk 4:42-44

³⁵ Ana kolulagi, pogos naña lakaporo pe kokoreko re poli waa, Yesu sumalu, naga taaga mial petan uña, ana pa e yo mñano tai, mlen pa Arimana.

³⁶ Ana siraunia, yeririna la apimi akale si naga uña, ana Saemon la aña re si naga poli, la apa akalea.

³⁷ Lala akale mña pano-o, aña naga e yo nañane, apisa pania, asape “Yeririna tañena la moki apimin akale ko ke.”

³⁸ Ana Yesu pisape “Ee, nekilia mña ga. Ana peraga, monar teva mña ga e pulkumali tañena lañas naña sike ga waa, vena nekilia nelologon mña Lologena Wo nene van la. Sur ne na nene, in na nepetan ma ne nepitom nesike e yo nene.”

³⁹ Ana pñisi na Yesu pato mialoro ke e yo punu ga garo Kalele, mlologon ke e yuña na lotena kiena le Yu lala, pile plan ke mña yermare lala moki petan yeririna lala.

Yesu kila ruru yaru tai naña leperosi se yepena miania

Matu 8:1-4; Luk 5:12-16

⁴⁰ Ana yaru tai naña leperosi sike e yepena pimi puna Yesu, kinañ tano puna, piun mñareran tania, pisape “Awis, visae ko na otamñan ga, nelelaga sane ko ga okilia okilarurunu, neikiki sina.”

⁴¹ Ana Yesu sinena miye manene yaru nañane, naga pe maraun re sape visae tol lae naga vanon kiena inanena, ana naga mligan limana te

naga, pisape “Inu netamãnia, nanagane monar yepemã ikiki sina.”

⁴² Ana veraga ga yepena miania, leperosi nene ãisi petan yepena, naga mekiki sina.

⁴³⁻⁴⁴ Ana Yesu m̃areran pania, pisa pisape “Omloge ke ne, ovano ve ovisawal re suri nene wa, ana nanagane ga ne ova okom puna yaru wa vena naga kilia visuveve yepemã. Pisi na monar ova okila lotena va Ntewa a okila m̃ena kuãapaena na ikikiena nene naãa Mosis pisa, sape yaru monar kila vanon sur na sa nene, ana ãisin sur nene, yar wa kilia visawalia sape nanagane na leperosi naga ãisi.” Ana Yesu pitetalia naga pano.

⁴⁵ Ana pogos naãa yaru nene pano, pa pisayu sur la nene pan yeririna lala punu ga, kila sane visena nene pa ãar punu yo, pano-o kila sane Yesu pe mial re si pa loyumã e pulkumali taãena la poli, komin visae vano, yoko yeririna la ve moki aiminia. Naga sumã ga perinan pulkumali lala, ana yeririna lala asumã apetan ke kiela pulkumali lala, apimi puna.

2

Yesu kilia viewo m̃ena mlamulena viowa kiena yeririna lala

¹ Ana legiena laãas ãarovia, Yesu ãasuãe si pa ma pulkumali naãa Kapeneam, ana pe piavi re poli, yeririna la amloge asape naga pam si rui.

² Ana ãisi na la moki naãa apim puna, yo loyumã naga pulen la paãisi, a vanua m̃ena e mratava naga yepa vitokaki ga. Ana pogos naãa

la asike lele taaga sanene, Yesu mlologon Visena Wa kiena ne Ntewa pan la.

³ Ana e ke e pogos nene na, yar laṣasia atar yaru tai naṣa minana pimi, naṣa yepena wetelu ga mare. Ana la vari atar ga naga e m̃ana tog naṣa mono ke ea pimi.

⁴ Ana pogos naṣa apim atol yo naṣane, apisu sane yo pule pa rui, taṣatete si atar kiela erau nene va lavisin Yesu. Pisi na lala ataryaun naga apa metava e wos nen yuṃa naṣane, lala aṃepo wos nen yuṃa metava mesmesun ga e naṣa Yesu sike ea, amligan malumun yaru naṣa mono ke e m̃ana tog, pitomi tano e pulmas naṣane, pito loyuṃa.

⁵ Ana pogos naṣa Yesu kira pisu sur nene, kilia sape la nene, amlelaga m̃arera e naga paṣisi sane yoko naga iila kiela inanena nene, naga pisa pania, pisape “Naruu, in na nepiewo kon kioṃa mlamulena piowa lala.”

⁶ Ana e pogos nene yaru navianena na visalu-aena la ṣasia asuṃa ga, amloge ke visena kiena ne Yesu. Ana ṣisi na la kiela sitomena la miyuṃae piowa ke e sur nene,

⁷ apisa kare ke naga, apisape “?Yaru nene pisalele kare ke kia wa kiena ne Ntewa sanape na sanene? Ntewa naga taaga kilia viewo mlamulena viowa lala, pe yar re si tai poli, ana yaru nene pis ke sanene, naga sitom ke sape naga pe Ntewa narui.”

⁸ Ana veraga ga, Yesu mnunulu-ṣaria sape asitom ke piowa sanene e naga, ana pis pan

la, pisape “?Komin ya ne sinemiu la pulen ke sitomena viowa la ne sanene?

⁹ Visae nevisa ve sanini van inanena nene, nevisave ‘Nepiewo pa kioña mlamulena viowa rui,’ pona nevisa vania nesapenua ‘Osumãlu, osulowar moña tog, oyali,’ ana e visena lua nene, tai naga m̃areran navisaena, a tai naga meme ga naña avisa. Naña sape ‘Osumãlu, oyali,’ naga m̃arera manene laa, komin yoko akilia avisuluþar sane kiau visena nene pe lelaga pona pe pe lelaga re poli, naña yaru nene sumãlu, pona pe sumãlu re poli.

¹⁰ Ana nagane, neyumãen sur tai naña amiu asitom ke asape Ntewa ga naga taaga kilia yumãenia, vena akilia avisuluþar sane Narina Yeririna naga kiena puriukawaena torokin naña viewo mlamulena viowa lala na yomarava nini. Amiu ayagogan ruruia.”

¹¹ Ana Yesu pisa pa yaru na inanena naþane, pisape “Nepisa pan ko, osumãlu, osulowar moña tog, oyali ova uña.”

¹² Ana veraga ga, e maran la naña apisu ke, sumãl sanene, kus m̃ana tog, mial pa vanua pa uña.

Ana pogos naña þina la nene apisu sur nene, amilan paþisi, amieluar Ntewa, asape “Awee, pe tepisuli re sur tai sanene poli wa e kieta malena, þane ga ne.”

Yesu pio Matiu naña kiena kia tai Livae pimi tavevea

Matiu 9:9-13; Luk 5:27-32

13 Ana Yesu ðasufþe si pito garo e is nen pupia lapa, ana þina la moki apim lele taaga e yo nene akovivia, naga pian la ke.

14 Pisi na naga mial laa pa sane, kirawal yaru tai teke e kiena yumnaena e yumna na warpoloen kururu varu na takis. Yaru nene naga Livae, narina ne Alpeas. Ana Yesu pion pania, pisape “Oimi otavevenu.” Ana veraga ga Livae sumalu, taveve Yesu.

15 Siraunia, Yesu pa kinana e yumna mna Livae, ana e pogos nene, li nawarpoloen mna takis la moki, amio þarmarera tapena la, naþa apimi atotano veraga amio Yesu amio kiena nalogena lala, komin e legiena nene, yeririna kar la ne naþa atavevelili ma Yesu.

16 Ana navianena navisaluaena la þasia, naþa la ape le Varasi lala, apisu naþa Yesu teke veraga amio yaru la ne sanene, apiun tan nalogena lala, apisape “?Komin ya ne kiamiu navianena kinan ke veraga amio þarmarera la sa nene?”

17 Ana Yesu mloge visena nene, pisatame la, pisape “Yaru la naþa yepela poga ga la pe sinelan re asape ava puna ne yaru nakilaruruen maiena la poli, ana la ga naþa amai, la na sinelan paþisi. In na pe nepimin re naþa nevio yaru la naþa apisa ke asape amesmes þisi rui e marana ne Ntewa vena ataveve inu, peraga, in na nepimin li viowa la sane la nini.”

Naviunena tai e lepas na monsilena

Matu 9:14-17

18 Ana e pogos nene, nalogena kiena ne Yoane Nakeena amio le Varasi lala aþuar ke þelaga namonsilena nakilaen lotuena van Ntewa, ana

yeririna la apim pu Yesu, apiun tania, apisape “?E, sanape ne naþa nalogena kiena ne Yoane la amonsilu pe nakilaen leniena, a nalogena sa le Varasi m̃ena lala, akila ke maran taaga, ana komin ya ne kioṃa nalogena lala pe akila re poli?”

¹⁹ Ana Yesu pisataṃe la, pisayu naga amio kiena nalogena lala, sane la akekara paṃisi pogos naþa naga sike amio la, ana ṃisi na sinela viowa pogos naþa sa naga ure matan la, ana pisape “? Pogos naþa yaru natalopa-ena sike e þaþagena amio kiena erau lala wa, asitom ke asape lala monar aligan kinanena na þaþagena? Peraga.

²⁰ Ana siraunia, visae pogos tai nasinekar kiena ne yaru nene laþasia aimi aurelua naga vetan kiena erau lala, e pogos nene narui kiena erau la nene akilia aligan kinanena, komin naþa la sinela piowagan manene naga.”

Sur viu amio sur marua

²¹ Pelaga na monsilena nene, naga þelaga marua tai na lotena kiena ne le Yu lala, ana Yesu sinenan pisape kila meraravan van la sape þelaga marua la ne sanene, la taþatete yakol si amio suri viu la naþa naga pian lan ke ne. Ana pisa þakaiwa tai e lepas nene pan la, pisape “Taþatete tela kinakina kulmrae tai naþa pe urviu ana tesuluwo ruru pulus naþa teke e kulsota marua nene, komin kulmrae viu nene kilia urewowa kulsota nene komþas, ṃisi na pulus naga kilia vim ve keviu laa sane.

²² Ana kuruta na munena naþa sirpup pava ke ga wa, taþatete tetaron vito e kulus nen

nane naña pe urmarua, naña ataron kuruta na munena pito ea yam moki rui. Ana visae tekila ve sanene, yoko kuruta nañani lapa, kila kulus mapoa, kuruta namunena naga taroi, a kana pias nena piowa nena ga. Ana kuruta viu, monar tetaron va e kulus nen nane naña pe urviu, m̃arera ruru po, ana tekilia teligan ruru mom̃a yam ve piavi.”

*Yesu pe suñen Legiena Wa
Matiu 12:1-8; Luk 6:1-5*

²³ Ana e legiena tañena si tai, naña pe Legiena Wa, Yesu amio kiena nalogena lala amial apano, ana kiela mrapa naga pa kom lokove na kona lala. La amial m̃a sanene, pano-o kiena nalogena la viso kari la, ana apae plan kona lañasia akania.

²⁴ Lala akila ke sanene, le Varasi la ãasia asum̃a e nañane, naña akirawal ke Yesu lala, apisa pa Yesu, apisape “!Ei, okira! Kiom̃a nalogena la akila ke sanene, la pe pon re akila sanene e Legiena Wa poli, sa ve sanene la akilaro ke kieta navisaluaena ne.”

²⁵ Ana Yesu pisatañe la, pisape “?Pona pe amiu apuloli re e Visena Wa pogos tai poli yo, naña pisayu sur la naña Parin Suñe Keviu Tepet kila nanua sumo? !Amiu akilia ruru pa rui! Naga amio kiena yaru lala viso kar la pañisi,

²⁶ naga pa loyum̃a e lele wa kiena ne Ntewa, mla kilaparavi wa naña navisaluaena pisape yar wa ga lala akilia akania, ãisi na Tepet la akania. Ana Apieta, naña pe ãarin yaru wa e pog nene, naga tam̃an ga pan la.

²⁷ “Nevisa van amiu, sane kieta navisaluaena lala pe pe na m̄areran kare itaen re si poli. Ve sanene na, Legiena Wa naga pe pe na kila kareen re si malena kiena yeririna la poli, ana pe naiila itaena.

²⁸ Ana Narina ne Yeririna naña pe suñen sur punu ga, naga ke narui pe suñen m̄ena Legiena Wa, naga ga kilia visa ya naña tekilia teyuñāen e Legiena Wa, a naña ve teyuñāen re.”

3

Yesu kila ruru lima ulu tai e Legiena Wa Matiu 12:9-14; Luk 6:6-11

¹ Ana e Legiena Wa si tai na, Yesu naga pa si e yuñā na lotuena, ana e pogos nene, yar tai naga m̄eke loyuñā naña limana tai pulu.

² Ana le Varasi lañasa naña sinela kar ke pa Yesu rui, asike lavisin naga e pogos nene, la asape apisuar ruruli ke naga, vena alual li ãelaga viowa ãasia e naga, ana sinelan asape avisuli m̄ena yoko Yesu kila ruru lima ulu nene e Legiena Wa nene pona ve kila re.

³ Ana Yesu pisa pan yar nañane, pisape “Osum̄alu, ovam metava e nini wa,”

⁴ ana naga piun tan la naña asike ne, pisape “?E, kieta navisaluaena pisa ke sape tekilia teyuñāen yara la ne e Legiena Wa lala? ?Pisa ke sape tekilia teyuñāen sur la naña po, pona sur la naña piowa? ?Po pisa ke sape tekilia tetamalia yaru, po towemoñaria?”

Ana la nene pe apisa re si sur tai poli.

⁵ Ana Yesu kira pisuveve la, pisu marala la m̃arera ga sike na, ana naga mloge piowa manene papisi vanonia, ana sinena kari la. Ana naga pis si pan yar naña limana pulu, pisape “Kian mesmesun li lumom̃a wa.” Ana pogos ga naña yar nene kila sanene, limana pimi po sina ga.

⁶ Ana le Varasi la amolue, apa mesmes ga apisu yeririna kiena Suņe Erot, naña lala akilia alual li mrapa tai na weñaren Yesu ve sanape.

Yeririna la moki apimin Yesu

⁷ Ana Yesu amio kiena nalogena la apetan la, apato si garo pupia lapa, ana yeririna la moki atavevela apatove. Yeririna la nene, laņasia amolue e yo taņena lala nae Kalele,

⁸ a la ñasia apitom tano e lepas naña Yutea, amio pupia kiela kumali naña Yerusalem, a ñas apitom e lepas naña Itumea, a ñas apitom e wii naña Yortan lepas na vano, a ñas akom ma pupia sive keviu e yo lala nae kumali keviu lua nene, Taea amio Saeton. La punu nene amloge pa visena na sur la naña Yesu miyum̃aen ke rui, ana asape aviminia.

⁹ Ana pogos naña la punu ga nene asike e is nen lapa, Yesu pisa pan kiena nalogena la pisape ava avisawo narin waa tai tom̃a ga, komin yaru la nene moki liu, ana naga yepen mavin sape sa ñisi yar la aim yo kuskus manene la puna.

¹⁰ Na nene komin naga kila inanena la moki amloge po si rui, ana yar taņena la naña aminana

ke wa, la m̃ena moki nãa asusunlan ke asape aimi lavisin Yesu, vena atol ga naga.

¹¹ Ana e pogos nene, visae ninuna viowa la asike e yeririna la p̃asia, visae avisu Yesu, lala monar avatanonia, akinai e mia lana, avion m̃areran, avisave “Ko na ope narina Ntewa.”

¹² Ana Yesu pis m̃arera pan ninuna viowa la nene, pisalũar la pisape yoko ve avisawal re sanene van yaru lala avisave naga ai.

Yesu mliganar kiena nalogena la lualima taaga pa lua

Matiu 10:1-4; Luk 6:12-16

¹³ Ana siraunia, Yesu naga pa metava e yo nãa pe kunusia, naga pio yeririna lãasia pisape aimi puna.

¹⁴ Ana pogos nãa apimi, naga mliganar la lualima taaga pa lua, pisa pisape lala ave nalologena, nãa kiela yum̃aena na ve sanini: yoko monar la ayal luen ga amio naga, a yoko naga ligan la vena akus Lologena Wo va e yo lala,

¹⁵ a yoko puriukawaena na m̃eneplanen yer-mare sike e la.

¹⁶ Ana kia kiena ne nalologena ne lala sanini: Saemon, nãa Yesu sikiapu si ki viu tai Pita,

¹⁷ a Semes, nãa narina ne Sepeti,

a Yoane nãa wenla ne Semes nene, nãa Yesu sikiapu lalua nene rui, asape Ponases, nãa kana kinasia pisape la lua nene ape polilu nena ga, komin la lua nene, pulgola apismolue lue ga,

¹⁸ a Antru,

a Pilip,

a Patalomiu,

a Matiu,
 a Tomñas,
 a Semes naña narina Alpeas,
 a Tateas,
 a Saemon, naña kila politik pan le Rom lala,
¹⁹ amio Sutas nae Kariot, naña siraunia
 pielua Yesu.

*Namratava puna ne Yesu asitom ke asape naga
 pe wowe*

Matiu 12:24-32; Luk 11:14-23, 12:10

²⁰ Ana siraunia, Yesu ñasupe si umña, pupia
 ñina la apim si puna, ana Yesu amio kiena nalo-
 gena la amiyumñae la mña pano-o pe aparurula
 re nena ga, akinana re poli.

²¹ Ana la naña e mratava puna ne Yesu amloge
 naña naga miyumñae manene la pa sanene, am-
 loge mña yar tañena la apisayu ke naga, apisape
 “!Yar nene kilalu pa ñarina rui!” ana anena amio
 wenla lala, apano asape aurelua naga vetan la.

*Yerkawa mña lala apisa ke asape Yesu
 miyumñae ke ga e puriukawaena kiena ne Yermare*

²² Ana e pogos nene, navianena na visaluaena
 lañasia amligan ma Yerusalem apitomi e yo
 nene, la mña apisayu ke Yesu pan yeririna
 lala, asape “Yaru nene, suñe kiena yermare la
 naña Pelsepel, naga pa mñeke e rui,” ana apisa
 mña, asape “Yar nene, naga mña pile plan ke
 ga yermare lala e puriukawaena naña Pelsepel
 tamñan pania.”

²³ Ana Yesu pio la apimi lavis puna, pisi pan la
 e ñakaiwa, pisa sape “?Sanape, amiu asitom ke

asape Yermare naga kilia m̃enelua sina Yermare?
!Naga taṓatete nena ve sa nene!

²⁴ Visae suṓe tai, kiena yeririna la aureure, sane komṓas la na akawela ke amio laṓas, yuṓaena kiena suṓe nene taṓatete ga suṓalu.

²⁵ A visae uṓa tai, la aureure naṓa la ṓasia asape aṓene plan lala ṓasia, yoko yeririna la nene taṓatete asu ruru pogos tai.

²⁶ Ana sa m̃ena nene, sa yermare kiena Yermare Lego, la ṓasia asuṓalu asape akilali naṓa aṓene plan lala ṓasia, nanene kana kinasia sane nasuṓenena kiena Yermare taṓatete suṓal m̃arera, kiena puriukawaena naga ṓisi. !Ana peraga, yermare m̃arera ke ga wa!

²⁷ “Kam na apisu ke ne, visae yaru tai sinenan ke pisape va loyumuṓa m̃ana ne yaru m̃arera tai vena vinaun kiena sur lala, naga monar war kilika viar ke ne yaru m̃arera nene sumo wa, ṓisi na kilia war plan kiena suria. Ana nekila ke sanene pan yaru m̃arera nene Yermare.

²⁸ “Lelaga nepisa ke pan amiu, mlamulena viowa kiena yeririna lala, amio visena viowa la naṓa apisa ke nene, Ntewa kilia viewo la vanonia,

²⁹ ana yar naṓa visae visanena kare Ninuna Wa, visa kiena yuṓaena ṓasia Yermare Lego ga naga miyuṓaenia, yar na sa nene taṓatete tol naviewoena pogos tai, kiena mlamulena viowa nene tolue ga vano-o taṓatete ṓisi pogos tai.”

³⁰ Yesu pisa ruru si visena m̃arera nene pan la komin la nene la ke narui naṓa apisa ke asape

ninuna naña teke e naga pe ninuna viowa ga tai.

Anenane Yesu amio wenla lala apim asape aurelua naga

Matiu 12:46-50; Luk 8:19-21

³¹ Ana anenane Yesu amio wenla la apimi akate e pog nene, asuñal ga asuña vanua, amligan visena pavinia vena naga vitom katen la.

³² Ana e pogos nene, pupia ñina atotano ke lavisin Yesu, ana visena nene pa tol naga, la apisa apisape “!E, anoña amio womla lala asike vanua, asape avis kone amio ko wa!”

³³ A Yesu pisatamē la, pisape “?A aneu naga ai? ?A wolai lala ai?”

³⁴ Ana kira pisuveve la naña ateke lavisinia pisa pan la pisape “!E, apisu ke ne! Aneu, amio wolai lala, la ke nene narui.

³⁵ Komin yaru naña miyuñaen sur naña Ntewa naga sinenania, yar ne sanene naga pe wolai, a pe vineu, a pe aneu ña rui.”

4

Pakaiwa na yaru naña peven kona

Matiu 13:1-9; Luk 8:4-8

¹ Ana e pogos tañena si tai, Yesu pian ke yaru lala e yepas nen lapa nae Kalele. Ana yeririna la moki naña apimi puna e pog nene, kila naga pa metava e narin waa tai naña toña e lapa nene, pa totano metava ea, ana yar la naña asuña ga ūra.

² Ana naga pian la ke e sur la moki e ñakaiwa,

³ naga pisa pan la, pisape “Ayagoga ruru lia. Yar tai, naga pa peven kona e kana lokove.

⁴ Ana pogos naþa naga peven kona la pa sanene, kurus la þasia kekapil lavisin laa is nen mrapplepa. Ana siraunia, manu la apimi atete plan sina.

⁵ “Ana kurus laþasia kekapil e yo naþa kilavaru sike vatano. Ana e yo nene pe porotano wo keviu re poli teke metava, ana kila narui akapuru iroro ga,

⁶ ana pogos naþa mrae þarlar pa metava, yepisusunun sus lala, veraga ga amiyayai komin þeligas la pe pito manene re tano poli.

⁷ “Ana kurus þasia amlolor e yo tai naþa sumo pe ate plan ruru re kilika la naþa pe nonos e poli, ana þisi na kilika nene kapur sina keviu, ana piwo make ga sus nen kona la naþane pano-o amarmare, pe aþar re si mras la poli.

⁸ “Ana kurus taþena la amloloru e porotano naþa po, akapuru po, pano-o aþar mrasnela lala. La þasia aþar mrasnela tol lualima yam telu [30], a laþas aþar tol lualima yam orai [60], ana laþasia pa laa tol ponotia taaga [100].”

⁹ Ana Yesu pisa pan la, pisape “!Amiu punu ga kiligamiu sike na. !Popon sa aloge kilia kiau visena nini!”

?Komin ya ne Yesu pis ke ga e þakaiwa lala?

¹⁰ Ana siraunia, þina lala apiaða tetai, ana Yesu naga taaga ga sike, ana yar la naþa asike amio naga amio kiena nalogena lala, apim apiun tania apisape “?Kinas nen þakaiwa nini naga sanape?

?Ana komin ya ne ko na okuan ke visena la ne sa nene, ana opian ke m̄ena yaru lala e p̄akaiwa?”

¹¹⁻¹² Ana Yesu pisatam̄e la, pisape “In na nepian la ke e p̄akaiwa la nene, komin la ape p̄arm̄arera la paṗisi, sa naṗa akila ke visena kiena Navisawalena Aisea na konua rui pimi pe lelaga, naṗa pisa ke sape

*‘La akirava, akirava m̄a vano-o, amloge, amloge
m̄a vano-o,
ana taṗatete avisu kilia suri tai, taṗatete
m̄ena aloge kilia suria.*

*!Visae peraga, pona avilon kiela sitomena la yo
rui, pona Ntewa viewo pa kiela mlamulena
viowa la yo rui!’* *Ais 6:9,10*

“Vanon sur sanene, inu nepisape lala ape p̄arm̄arera lala, asuṗa perina paṗisi. Ana amiu ke narui, yoko wo laa van amiu vaṗisi. Navisawanena navesuṗenena kiena ne Ntewa, yoko in na nevisawal ruru merarava wo van amiu.

¹³ “?Ana sanape, amiu pe amloge kilia re kinas nen kona nene poli? ?Ana visae amiu pe asitom kilale re kinas poli, ana sanape yoko aloge kilia p̄akaiwa taṗena la naṗa sa nevisayu van yeririna lala?”

*Yesu pisawal kinas nen p̄akaiwa na yar naṗa
peven kona*

¹⁴ Ana Yesu pisa, pisape “Pogaga, yoko in na nevisayu meraravan kinas nen p̄akaiwa nene van amiu. Kana kinasia naga sa nini: Porotano taṗena la nene, la sa naṗa malena kar la ne kiena yeririna lala. A naṗa yar nene peven ke kurusia

e porotano la nene, naga sa naŝa apisawal ke visena kiena ne Ntewa pan yeririna lala.

¹⁵ “Porotano m̄arera naŝa e is nen mrapplepa, naga sa naŝa yar naŝa pogos naŝa mloge visena kiena ne Ntewa, ana visena nene pe pa ruru re nena loyuma e losinena poli. Ana manu la nene, la sa naŝa Yermare, naŝa veraga ga pimi mlalua sina visena kiena ne Ntewa petan los nen yeririna nene.

¹⁶ “Ana porotano naŝa kilavaru naga sike tano, naga sa naŝa yar naŝa mloge visena kiena ne Ntewa, ana verakorena ga kekarania, ana mlavia,

¹⁷ ana visena nene naga pe towawa ruru re e losinena poli. Ana naga kapuru sa ga narin sus tai naŝa pe pe p̄eligas ruru re poli naŝa kila yoko kapuru ve plas ga. Ana pogos naŝa sa pog m̄arera la imi pona yar la asape avevela komin amlelaga ke e visena kiena ne Ntewa, ana verakorena ga aligan sina ga.

¹⁸ “Ana porotano naŝa kilika viowa sike ea, naga sa naŝa yar la amloge visena kiena ne Ntewa,

¹⁹ ana p̄isi na, lala asitom manene la kiela malena, a sitomena na waren sur ve moki vim kila kotalia la, ana lala sinelan manene la sur wo lala na yomarava nini. Pelaga la nene pimi sane kilika viowa, piwo Lologena Wo nene kila sane ve war re si mrasa e malena kiena yeririna la nene.

²⁰ “Ana porotano wo nene, naga sa naŝa yeririna la naŝa amloge visena kiena ne Ntewa, amloge kilia, akekarania, amlararia e losinela,

ana siraunia aþar mras nen Lologena Wo nene e kiela malena, la þasia aþaria tol lualima yam telu [30], þas tol lualima yam orai [60], þas tol ponotia taaga [100].

“Kinas na þakaiwa na kona maro ga e nene.”

Pakaiwa na kapi na tegaena

Luk 8:16-18

²¹ Ana Yesu pisa sina pan la, pisape “Ita yeririna lala, visae tesilan kap vivaga, yoko ve telawan re to vatanon paket. Peraga, monar tetelan to metava e kana lele nena vena tegoli punu yo.

²² Sanene, nanagane nasuþenena kiena ne Ntewa sane kapi te ga nene, naþa nanagane na molmolue ke e ita narui, vena tegoli sur punu ga, ana sur lala punu ga naþa apisawo sike na, a visena wan lala, monar akakate e yomerarava.

²³ !Ana amiu punu ga kiligamiu sike na, popon sa aloge kilia kiau visena nini!”

La monar ayagogan ruru visena kiena Yesu

²⁴ Ana Yesu naga pis si pan la, pisape “Amiu monar ayagogan ruru kiau visena, asitom ruru la lia. Yaru naþa mloge, ana pe taveve re poli, naga yoko taþatete loge kilia ruru si narui. Ana yar naþa mlogear kiau visena la, naga kilia loge kilia ruru mēna kiau navianena la moki naþa sa imi si sirau.

²⁵ Ana yar naþa kiena suri moki pa rui, yoko war ve moki laa va laa sane, ana yar naþa pe

kiena sur re poli, p̃isi na naga kilalu narin sur naṣa mla ke.”

Pakaiwa na kurusia naṣa kapuru ke

²⁶ Ana Yesu pisa ke sina ga pisape “Nasup̃enena kiena ne Ntewa naga sa naṣa kona naṣa yar tai naga peven ke e kiena porotano.

²⁷ Pogos naṣa peven pae na, pe kila re si sur tai e kurus nene poli. Naga mom̃a momalio ga, tavolo, momalio, tavolo, sum̃alu, salue ga nene yemalo a legiena, ana kurus nen sur nene, naga ga sus plamolue, kapuru ke sanene. Kapuru m̃a pano-o, ana yar nene naga kiliar re kurus nen sur nene kapur ke sanape poli.

²⁸ Yar nene kilia re sur tai poli, pano-o korowas la kian pa perina piavi re na p̃ar vinasia, p̃isi na tau.

²⁹ Ana pogos naṣa kinas la menmene ruru po, yar nene siar si miyum̃ae narui, p̃ar kiena playu pa te plan mrasnena lala.

“Ana navesup̃enena kiena ne Ntewa naga kapur tekak ga sanene, telivi ke e yomarava wetelu nagane, ana e legiena tai yoko tekirawal pupia mrasnena vam metava.”

Pakaiwa na kurus nen purpa

Matiu 13:31-32; Luk 13:18-19

³⁰ Ana Yesu pisa sina, pisape “Pelaga navesup̃enena kiena ne Ntewa naga pe taṣena ga sike na, naga m̃arera paṣisi naṣa nekilia nekirawal si p̃akaiwa tai naṣa vena visaen sape naga sanape.

³¹ Sa naṣa kurus nen purpa tai yo, naṣa naga tekaki ga miyuve kurus nen sur taṣena la naṣa

temapila la ke e kata lokove lala, naga tekaki na tekaki.

³² Ana pogos naña kapuru keviu, purp̄esia naga pimi keviu miyuve make ga kinanena taḡena la naña sike e kata lokove lala. Ana pupia korowas la paḡisi, naña manu la akilia ava ase ea, vanon kana wamal po, yomanin ea.”

Yesu naga pian yeririna la e ḡakaiwa

³³ Ana Yesu pian ke yeririna la e Lologena Wo e ḡakaiwa la moki sanene, naña sane torokin yoko akilia aloge kilia.

³⁴ Visena la punu ga naña pian lania, ḡakaiwa teke loyuña, ana pogos naña naga ga sike amio kiena nalogena la, e pogos nene narui na naga sun pisa meraravan kinas nen ḡakaiwa la nene pan la.

Pupia lagi naña Yesu naga pisawoia

Matiu 8:23-27; Luk 8:22-25

³⁵ Ana Yesu suña ke e waa naña naga totano e pian yeririna lala, ana ko yepekilavi, naga pisa pan kiena nalogena la, pisape “Ei, ita tokusro teva komḡas nen lapa vano.”

³⁶ Ana kiena nalogena la amligan yeririna la asike na, apa e waa naña Yesu naga teke pa e rui apano. Ana narin waa si laḡasia asiraun la.

³⁷ Narin waa la nene apato ña pano-o, pupia lagi tai naga molue, miyu lapa nañane kila pupia sive naga kekela ke e waa, kila na pulen ke e sive narui, lavisi talilu.

³⁸ Ana Yesu naga miyulugan ke e yulugana tai e ḡeren waa, monon momalio ñaga. Pisi na lala apa apioḡegeia, ana apisa pania, asape “!

Navianena! ?E, sanape pe ositomāl ita re na lavis tetalilu ne po?”

³⁹ Ana Yesu suñalu, pis m̄arera pan lagi, a pis m̄ena pan pupia sive la nene, pisape “!Amiu ava ruru amiu!” Pisi na lagi molue re si poli, yo mare ga m̄eke na.

⁴⁰ Ana Yesu pisa pan la, pisape “?Komin ya ne amiu amarau sanene? ?Amiu pe amlelaga re e in poli yo?”

⁴¹ Pisi na la amarau pañisi, apiuyun ke sina ga petan la, sape “?Yar a nene? Aulai, naga pis ga sanene na, lagi amio sive amlogear veraga ga.”

5

Yesu m̄ene plan ninuna viowa moki petan yaru nae Kerasa

Matiu 8:28-34; Luk 8:26-39

¹ Ana Yesu amio kiena nalogena lala apimi aṗarpo yo e komṗas nen pupia lapa nene, aṗarpo lologia yo naṗa Kerasa, naṗa laṗas apio ke asape Katara pona Kerkasa.

² Ana la apa ura e yo nene, ana e yo nene puluve na yar mare la asike ea, ana yar tai naṗa ninuna viowa teke e naga, naga sike e lotap nene, sa naṗa pe m̄ana uña.

Ana pogos naṗa Yesu pula tano petan waa, veraga ga yar nene molue e lotap, kiriri pitomi puna.

³ Yaru nene marana ka pañisi, yar la akilayon asape aviaria pano-o akilapule ga yonia.

⁴ Yam moki rui apiar lana amio limana e sen pona kilika, apiviaria panon laki ana naga pureroro ga sen la nene amio laki lala, pano-o

pe yar re si tai poli naña puryuna kawa torokin kila yar nene imi momãu.

⁵ Ana kolemalu punu ga amio legiena, naga sumã mialialor ke e lotap a metava mña e kunus lala, naga monon mãmãul ke, a pilavilan wowa ke yepena lala e kilavaru.

⁶ Ana yar nañane, pogos naña naga sumã ke perinan yo naña Yesu la apim ura ea wa, naga mñal pa Yesu rui, kiriri pitomi tano puna, patanonia, kinai puna.

⁷⁻⁸ Ana Yesu pisa, pisape “!Ninuna viowa, ovetan yar naña, oure matan naga nanagane!”

Ana ninuna viowa mlakai mñarera pania, pisape “A ko, Yesu, narina ne Ntewa Mali, kioña ya ne teke e inu? !In na nepiun tan ko, e kia kiena ne Ntewa, sane yoko ko na ve ola re nakoena van inu.”

⁹ Ana Yesu piun tania, pisape “?Ko na kioña kia ai?”

Ana ninuna viowa pisatamea, pisape “In sa kia Yaru Moki na Mara, komin imimi moki liu.”

¹⁰ Ana ninuna viowa nañane piuyun mñareran ke petan Yesu sape ve mne plan la re vetan mñala neñe.

¹¹ Ana e yepas nen kunus nae yo nene, pupia pegas nen nompui, la asun akolkol mña e porotano, naña tol sane manu lua [2000],

¹² pñisi na yermare la nañane atagi, apiuyun mñarera petan Yesu, asape “Awis, oligan imimi meva e nompui la nene, otamñan imimi meva mese e losinela.”

¹³ Ana Yesu tamñan pan la, pisape “Pogaga, amiu avano.” Ana lala amolue petan yar nañane,

apa e los nen nompui la naḡane. Ana veraga ga, nompui la nene akiriri, apito tano e yeparpas nen kunus nene, amloloru apito tano e pupia lapa naḡani, ana la amunḡar lan wii na amar-mare.

¹⁴ Ana yaru navisuaren nompui la apureure, apito uḡa, apisawal sur nene, a lala apisawal mēna e yo taḡena la naḡa sike ne, kila narui na yeririna la moki naḡa apavin asape avisulia.

¹⁵ Ana pogos naḡa la apavini, apisu Yesu naga sike amio yaru naḡa sumo ninuna viowa la ase naga, mian pa kulmrae rui, pa ruru pa rui pe maran ka re si poli. La apisu naga pimi po si sanene rui, amaraunia.

¹⁶ Ana la naḡa asuḡesania apisu ke sur la punu ga nene, la asunyu pan yeririna taḡena la naḡa apam marea, la apisayu sur la naḡa Yesu miyuḡaen pan yar nene, a sanapen nompui la naḡa amloloru apito e wii.

¹⁷ Ana la apisu sane piowa ga, aḡareran ke pan Yesu asape naga monar ure vetan kiela yo.

¹⁸ Ana ḡisi na Yesu la apito si tano e kiela waa, pogos naḡa Yesu pa ke metava e waa, yar naḡa sumo ne, naga pitomi piun māreran ke pan Yesu, pisape “Awis Suḡe, in na sineun nesape ko otamānia ita la nini!”

¹⁹ Ana Yesu pe taḡan re poli, pisa pania, pisape “Peraga, popon sa ova si uḡa, ovisayu van la naḡa na mratava pun ko amio kioḡa erau lala, ovisayu van la sanape naḡa Ntewa sinena miye ko paḡisi, ana kila po na po sanene pan ko.”

²⁰ Ana yaru naḡane ḡasuḡe sina, pa e yo punu ga e laḡas naḡa puna, naḡa apio ke asape

Pulkumali Lualima, naña yaru la naña Le Yu lala pe asu re e poli, ana pisawal ke yuññaena wo naña Yesu miyuññaen pania. Ana lala naña amiyaggon kiena sunena nene, lala amilan pañisi.

Narina ne Saeras naña sira, amio sira naña tol kulkota ñana ne Yesu

Matiu 9:18-26; Luk 8:40-56

²¹ Ana Yesu la akome waa, akusro sina komñas nen lapa naña narui, ana pogos naña Yesu pula pa ura sane na, pupia ñina na yeririna la apim akovivi sina asike.

²² Ana yaru keviu tai na yuñña na lotena nae yo nene, kiena kia Saeras, naga pimin sape visu Yesu, pimi lavisinia, kinai tano puna.

²³ Naga tagi pania, piun tania, pisape “Naruu naña sira, naga mai na mai, ana nanagane na pona naga mare pa yo rui. Ana nepiun ke tan ko vena ko oim, oligan lumoña te naga, vena loge wo sina, mal ve piavi re laa sane wa.”

²⁴ Ana Yesu ñarlar sumalu, amio yar nañane apavin, ana yaru la moki e ñina la nene, la ñena ataveve la, naña amigagar la ga e yepas nena ne Yesu apano.

²⁵ Ana lala yaru tai naña apa ataveve ke Yesu sanene, naga sira, naña inanena na kupario teke e naga legiena punu ga, tol kas lualima taaga pa lua rui.

²⁶ Ana sira nene, naga pul yaru na kilaruruen inanena la pano-o kiena kilavaru la ñisi, akilayon naga pano-o pañisi, ana naga mloge maran taaga sike, inanena nene naga pimi keviu lue ga legiena punu ga.

27-28 Naga mloge yam moki rui naña yaru la apisayu ke Yesu, ana kiena sitomena tai na, sitom ke sape “Visae netol ga mña kulkota, yoko kiau inanena naga pñisi.” Sanene narui na pa tapolou likan yeririna la nañane, naga pimlilue lavis varaun mñasina ne Yesu, kian limana sane na, tol ga mrapogos nen kulkota mña ne Yesu.

29 Pogos naña naga tol kulkota mña Yesu sane na, veraga ga e aora nene kiena kuruta nañane pñisi, ana naga mnunun luñaria e naga sane kiena inanena naga kovio petan rui.

30 A Yesu mña mnunun luñar sur tai, sane puriuna tai kovio petania, ana naga pilon veraga ga likan yeririna la nañane, piunia pisape “?E, ane tol ga mña kulkota nanagane?”

31 Ana kiena nalogena la apisa-tañea, asape “? Ko na opiun osape ane tol ko ga nagane, sanape ne, ko pe opisu re yeririna la moki manene na amigar la akovivi ko ke ne po?”

32 Ana naga sumña kiraweke mña sape kirawal li ane tol naga.

33 Ana sira nañane kilia pa rui, sape naga, naga marau pañisi, sinena kurkur na kurkur, pñisi na pimi puna Yesu, kinai tano e mialana, pisawal sur punu ga.

34 Ana Yesu pisa pania, pisape “Auia, nalelagaena ga kioña e inu kila ko omloge si po narui. Kioña inanena naga kovio nenaga. Sumñarena kiena ne Ntewa sike amio ko, owasuñe ko sina ga oto uña.”

35 Ana pogos naña Yesu pis ke pan sira nañane wa, visena tai kom ma uña mña ne Saeras pitomi, pisawal pania sape “Naruña sira nañane

naga mare rui. Yoko ve oure re si pupia navianena nene vavini, ve okila kare re naga.”

³⁶ Ana Yesu mloge mña visena nene, pisa pan Saeras, pisape “Ve sinemña viowa re, olelaga ga mñarera e Ntewa.”

³⁷ Ana Yesu pialuñar yeririna la punu ga sape la asumara ga ve ataveve la re avavini, naga pure ga la telu Pita, a Semes amio wenla naña Yoane apavini.

³⁸ Pogos naña apa lavisin umña mñana ne yar keviu nañane, apisu yar la sinela piowagan ke nin sira nene rui, la asike atagin ke, amlolokain ke.

³⁹ Ana Yesu pa loyumña, pisa pan yaru la nene, pisape “?Sanape ne amiu amlolokai keviu ke, atagi ke sanene? Sira nene naga mare re poli, naga momalio ga ne.”

⁴⁰ Ana la apitale viowa ga pania.

Ana Yesu pisa pan la apa vanua, purear ga anenane sira nene amio arimana, a kiena nalogena la telu nañane apa e lele naña tas nen narin sira nene mñeke ea.

⁴¹ Ana Yesu pa mlilu tarar limana, pis pania kome kiela visena, pisape “Talita kum,” kinas nen visena nene pisa ke sape “Kiau narin sira, ko osuñalu lia.”

⁴² Ana veraga ga e aora nene, narin sira nene naña kiena kas tol lualima taaga pa lua [12], naga suñalu, mial. Ana pogos naña la apisu sur nene, amilan na pano-o kiela sitomena plas ga.

⁴³ Ana Yesu pisa pan la pisape ala re kinanena tai vania, a pisa mña pan la pisape yeririna tañena la ve aloge re sur nene.

6

Le Nasaret lala pe sinelan re Yesu poli

Matiu 13:53-58; Luk 4:16-30

¹ Ana Yesu molue e yo nene, ãasuñe sina ga pimi kiena, amio kiena nalogena la.

² Ana e Legiena Wa, naga pa amio yaru lala nae kiena yo nene e loyuma e kiela yuma na lotena, ana suma pian la ke. Ana pogos naña la amloge amilan kiena visena la pano-o pañisi. Ana la apisa apisape “!Aulai! ?Yaru nene naga ãar sur la nene pe? ?Naga tol namanmaruaena nene sanape? A naga kila ke kile la nene sanape ne?”

³ Ita tekilia ke yaru nene rui. Naga yaru na yumaenen ga yuma, naga pe narina ne sira naña Maria, a la nene, Semes, a Yoses, a Suta, a Saemon, naga pe wenla ne la nene. A vinena lala, la ga naña asike amio ita ne.” Ana sinela karia, pe sinelan re nena naga.

⁴ Ana Yesu pisa pan la, pisape “Yaru naña pe navisawalena, yaru tañena lala akilia avatanon naga, ana yaru nae kiena yo, amio mēna nam-ratava puna, la ga nene tañatete avatanon naga.”

⁵ Ana e kiena yo wawa nene, Yesu tañatete kila kile la ea, ana naga mligan ga limana e yaru la lua la ga naña aminana, amloge si po.

⁶ Ana Yesu sinen pula mila pañisi komin yaru la nae kiena yo wawa naña pe amlelaga re e naga poli. Pisi na naga petan kiena yo, mial pa e pulkumali tañena lala ana pian ke yeririna lala.

*Yesu mligan plan kiena nalogena lala peve lua
Matiu 10:5-15; Luk 9:1-6*

⁷ Ana Yesu pio kiena lualima taaga pa lua nene, pis ruru pan la, mla namareraena pan la vena akilia ataulu ninuna viowa lala, a siraunia mligan plan la peve lua apano.

⁸ Visena wo la nene naña naga pisa pan la sumon naña lala apano, naga sanini, pisape “E lepas na kiamiu mrapa, yoko amiu ve awar re sur lañas amio amiu, ana kiamiu plasgai ga alararia ayano. Yoko amiu ve awar re kamiu kinanena ãasia, pona karo lala, pona varu.

⁹ Amiu akilia ayen kiamiu kulus nen lamiu lala, a ve awar re mamiu kulmrae tañena lañasia, mamiu kulmrae taaga nane amiyenar ke ne sa ayal avano.”

¹⁰ Ana Yesu pisa mñena ga, pisape “Pog naña sa la awere amiu ava loyumañã mñala, ana amiu monar akekaran ga nasuen amio na mratava nene, vano tol pogos naña sa amiu avatan si pulkumali nañane.

¹¹ Ana visae pulkumali tai, yeririna lañas yepela mavin were amiuena ava mñala uña lala pona yepela mavin loge amiuena, amiu aligan ruru kiela yo nene mñeke na, ana pogos naña sa amolue e yo nene, monar atanvan puluyavi nae yo nene naña sike e lamiu, sane kile tai, pona kiamiu visena mñarera tai pan la, sane yoko lala akus nakoaena tai naña mesmesun ga kiela ãelaga viowa nene.”

¹² Pisi na kiena nalogena lala apa amlologon pan yeririna lala asape monar avilopu la,

¹³ ana la aĩene plan ninuna viowa la moki e yeririna lala, ataron mĩena narin wel na mras nen olip e ĩarin nainanena la moki, sane kile na navisa ruruena kiena ne Ntewa, ana la amloge po sina.

Parin Suĩe Erot Antiĩas pisayu Yesu

Matiu 14:1-2; Luk 3:19-20, 9:7-9

¹⁴ Ana e pogos nene, Parin Suĩe Erot naga mĩena mlogeli mĩa sur la naĩa Yesu miyuĩaenia, komin kia kiena Yesu, apisawal ke pa rui e yo punu ga, a yeririna la punu ga akilia pa rui. Yar la ĩasia apisa ke Yesu, asape “Naga na, pe Yoane Nakeena si ne, naĩa naga mal sina e marena; sur ne na nene kila naga puriuna kawan nakilaen kile la sanene.”

¹⁵ La ĩasia apisa ke asape “Naga na yer marua Elaisa na konua rui,” a la ĩasia apisa ke asape “Naga navisawalena tai ne sa naĩa yermarua navisawalena lala nakonua manene la rui.”

¹⁶ Ana pogos naĩa Suĩe Erot mloge sur la naĩa Yesu naga kila ke ne, ana naga pisa sape “?Yaru nene, pona Yoane Nakeena ke sina ga ne. Inu netero pa ĩarina pa rui, ana nanagane naga mali sina e marena yo?”

?Yoane Nakeena mare sanape?

¹⁷⁻¹⁸ Ana Suĩe Erot pisa sanene vanon naĩa naga mĩemar Yoane Nakeena mare nanua rui, ana naga marau paĩisi. Ana marena kiena

ne Yoane Nakeena kana suniena nena sanini: Wenla Suþe Erot nene, naga kiena kia Pilip, naþa lalua arimala taaga a anela lua. Ana sumo, Pilip nene talopa amio sira tai, kiena kia Erotias. Ana siraunia, Suþe Erot pa þerelua lein sira nene pe wona. Ana e pogos nene Yoane pis pa Suþe Erot, pisape “Sur mesmesu re nene poli, naþa ko opurelua sira nene, komin naga pe wona ne womla.”

Ana Erotias pe kekaran re nena visena kiena ne Yoane nene, naga sinena karia, ana Suþe Erot mligan kiena yeririna la þasia apa atararia, apiari naga amligan pa e yuþa nakoarena.

¹⁹ Ana Erotias sinenan ke sape monar weþar Yoane, ana naga kila þele ga,

²⁰ komin Erot maraun wemoþarena. Naga maraunia komin naga kilia ruruia sane Yoane naga pe yar mesmes tai a pe yar wa, naga puar ruru ga suþa ga. Yam la moki naga mligan visenan Yoane pa puna lalua asun, naga kekaran visena kiena ne Yoane la paþisi, ana yam punu ga, visena la nene miyur ke naga, kila narui na naga kiena sitomena peve lua ke narui.

²¹ Pe piavi re poli na, Erotias mþal kiena mrapa tai. Nane e pogos naþa la akila þaþagena nasitoþalen legiena naþa Suþe Erot paeme ea, ana Erot naga kila kinanena kana kiena yarkeviu lala, amio nasumonena na yuþaena kiena, a yerkawa taþena lala nae yo naþa Kalele.

²²⁻²³ E pogos na þaþagena nene, lomþaru kiena ne Erotias naga polu e marala, ana Suþe Erot la akekaran kiena wolena paþisi, naga pisaaria mþarera pania, pisape “Suri ya naþa visae oviun

tan inu, nekilia netañan ga van ko, va tol komþas nen kiau sur make ga lala.”

²⁴ Pisi na sira naþa pa vanua, piun petan anena naþa Erotias, pisape “?Auia, yoko neviun yar ne tania?”

Ana anena pisa pania pisape “Ovisa ga vania ovisave, naga monar kus ga þarina ne Yoane Nakeena van ita.”

²⁵ Ana sira naþani miroro si pa loyumuña, pisa iroron ga pa Erot, pisape “In na sineun nesape okus ga þarina ne Yoane Nakeena mñene pialo tai imi ga nanagane e nini.”

²⁶ Ana visena nene kila Suþe Erot mloge piowa, pe sinenan re sape kilaro kiena navisaarena naþa pisaar mñarera rui e maran kiena erau lala,

²⁷ þisi na veraga ga e mña nena ga e pogos nene, naga miila kiena yar na mara tai pa pisa, pisape akus þarina Yoane vano. Pisi na lala apa e loyumuña e yumuña nakoarena nene, atelua kolmekina,

²⁸ ana la amligan þarina mñene pialo tai, akus pimi pan sira mñee naþane, ana kus pa pan anena.

²⁹ Ana siraunia, pogos naþa nalogena kiena ne Yoane la amloge suri nene, la apimi akus tasnena, apa amligan e lotap. Ana suniena kiena ne Yoane Nakeena maro ga e nene, ana pogos naþa Erot mloge suniena kiena ne Yesu, kila naga marau paþisi, mape Yoane Nakeena nene naþa naga mñemaria, mal sina.

Li nalologena la apa amlologon visena kiena ne Ntewa þisi na aþasuþela sina

Matiu 14:13-21; Luk 9:10-17; Yoane 6:1-13

³⁰ Ana e pogos nene, nalologena la naña Yesu mligan plan la apa amlologo, aņasuņe la si apimi. Ana lala apisayu pa Yesu sur la punu ga naña amiyumāen pan yeririna lala, a sanape naña apian la.

³¹ Ana yar la moki naña asuņa apimi ke pu Yesu, p̄isi na apano, ana p̄isi na taņena si la apimi, p̄isi na apano, salue ga nene, Yesu la pe apa ruru la re nenaga, pe aora re tai naña la akilia ala narin kinanena tai. Ana Yesu pisa pan la, pisape “Aulai, ita, tevetanli la e yo nini wa. Teva takale yo tai naña naga yo m̄ano, akilia avaruru amiu ea.”

³² Pisi na la apa akus waa tai, asape ava akale yo tai lepas nen lapa naña pe yar la asu re e poli.

Yesu pagan yeririna la moki taulu manu lima [5000]

³³ Ana yeririna la moki apisu sane Yesu la apa ke sanene, la m̄ena ga amolue e kiela pulkumali lala, akiriri ataveve la akom ura, apato atolņesa yo nene naña la apisu sane waa naga pato ke ea, la asumon Yesu lala.

³⁴ Ana Yesu pa ura, pogos naña pisu p̄ina na yeririna naña asike pa ura rui, naga sinena mie la paņisi, komin naga pisu la sa naña sipsip la naña akuspal mrapa, pe yar re tai naña kilia visuar la, p̄isi na naga pa sun pian la e visena wo la moki.

³⁵ Ana pogos naña mrae pito tano, nalogena lala apimi puna, apisa asape “E, Suņe, yo nini naga pe po re poli, a lavisi m̄ena yemalolo narui.

³⁶ Ana popon ko oligan ãina la nene awasuþe ava mala una pona pulkumali lala vena awul kala kinanena la þasia.”

³⁷ Ana Yesu pisatae la, pisape “Toko, popon amiu ga awar kinanena þasia van la.”

A lala amape Yesu naga pe pisa ruru re poli, ana la apisa asape “!Ke, peraga yo! Pona ko na sinoan ke osape imimi mowar pupia kieta varu ana mevato meul kilaparavi torokin lala manu moki nene akania!”

³⁸ Ana Yesu pitetalia la, pisape “Amiu avato avisulia aþara ke kilaparavi via na sike amio amiu nanagane.”

La apato apisu pae na, apam sina ga apisape “Memlarar narin kilaparavi lima ga teke na, amio narin ika naþa satin lua ga.”

³⁹ Ana Yesu pis pan yeririna lala, pisape “Amiu atotano e viluini wa,”

⁴⁰ ana la atotano e þegas lala, þegas laþasia sane lualima lima [50], ana þegas taþena laþasia sane ponotia taaga [100].

⁴¹ Ana naga mla narin kilaparavi lima naþane amio narin satin lua nene, kira pa ma e peni, pisa potena pa Ntewa vanonia, þisi na kaweroro narin kilaparavi lima naþane kian pa kiena nalogena lala vena avion plan van yeririna lala, pion mena narin ika lua naþane sa ke ga.

⁴² Ana la akan ma pano-o, meþela la kawa paþisi,

⁴³ ana kinakinas nen kinanena la naþa akanligania, torokin akon si va e karo la tol lualima taaga pa lua [12].

44 Ana yaru la naña akan kinanena nene, yermene ga lala, la atol sur sane manu lima.

Yesu mial yau metava e wos nen lapa

Matiu 14:22-23; Yoane 6:16-21

45 Ana Yesu pisa pan kiena nalogena lala, pisape “Inu sineun nesape amiu akus kieta waa, asumo akusro pupia lapa nene ava lepas ãasia e kumali naña Petsaeta, ana in na nesuwa nesuña neligan plan ke ne yeririna la nene wa.”

46 Ana pogos naña naga mligan plan yeririna la nene apa pae na naga pa metava e kunusia vena len.

47 Pogos naña yemalolo ke narui, waa nañane ñeke perina pañisi, lika e lapa, ana Yesu naga taaga sike ura.

48 Ana naga kira pisu la na ñarera pan la na valuanen waa pañisi, komin la apane ke pupia lagi, kila kiela waa naga pure malum ga. Pogos naña lavisi yelagi merarava, Yesu pimi pula, mial yau ga metava e wos nen lapa. Suri ne na nene vena naga va ãesan ura sumon la,

49 a pogos naña lala apisu naga mial yau ke e lapa pimi pula sanene, la apionia asape “!Aulai, suri ya ne pimi ke sanene! ?Yermare yo, pona yar ne sanene?”

50 Lala punu apisu naga sa nene, amarau pañisi.

Ana veraga Yesu pisi pan la, pisape “!E, ve amarau re, in ga ne.”

51 Ana Yesu ãiyu pa metava e waa amio la, ana veraga ga e aora nene, lagi nene mare, ana la naña asike e waa amilan pañisi.

⁵² Amilan sanene komin kiela sitomena la m̃arera ke wa, la pe apisu kilia re sur la naṓa Yesu naga kilia yum̃aenia e kiena puriu kawaena poli, sane ya naṓa miyumaen amio narin kilaparavi la lima naṓane.

Namaiena lala atol ga luas nen kulkota m̃ana Yesu

Matiu 14:34-36

⁵³ Ana Yesu lala akusro pupia lapa nene e kiela wa, apa atol yo tai, kiena kia Kenasaret. Ana pogos naṓa akoan kana kilavaru pa ura,

⁵⁴ apula petan kiela wa, ana verakorena ga yaru nae e yo nene lala apisu kilale Yesu.

⁵⁵ Ana lala akiriri atelivi piora e m̃ala yum̃a lala, akus kiela inanena la e m̃ala tog, apa ke e yo la naṓa amloge asape naga pa ke ea.

⁵⁶ Ana e yo punu ga naṓa Yesu pa ke ea, e yum̃a lala, pona pulkumali lala, pona mrapa lala, akus ke kiela inanena lala, amligan ruru la ke pa rui e yo metava lala, la apiun ke tania asape visae naga tam̃ania ana inanena lala akilia atoliga m̃ana luas nen kulkota. Ana lala naṓa atolga sanene, kiela inanena la ṓisi, amloge po sina.

7

Nalogenena kiena Yesu la pe ataveve re ṓelaga marua kiena le Yu la poli

Matiu 15:1-9

¹ Ana e pogos nene, le Varasi la ṓasia apimi lele taaga puna Yesu, amio m̃ena navianena navisaluaena, naṓa lala akom garo Yerusalem apami.

² Ana lala apisu ke sane pogos naña nalogena kiena Yesu la akinana ke, lala akila sane e nakiravaena kiena le Varasi la, la nene limala la na piowa ga. Na nene vanon pe ataveve ruru re narin mrapa la moki naña na kevanen limala sa naña le Varasi la apisa ke asape yar naga monar yuñāen, sumon naña kinana.

³ Nanene komin e pogos nene, le Varasi lala amio le Yu tañena la añareran ke pañisi nayuñāen ve sanene, vena taveve ruruen kiela ñelaga marua na kiela nalotena na sumo lala.

⁴ La akila ke sanene pogos naña amiyal apa kumali, pona akom pe, ana pogos naña la awasuñe la si uñā, la monar ataveve kiela navisaluaena na kevanlaen amerarava wo pona ave wa ruru sina. Pisin nakilaen sanene, la akilia akinana narui, komin visae la ve akila re, tañatete atol kala kinanena. Ana kiela narin navisaluaena mñena lañas moki naña monar atavevea, naña ñasia, na kevanen mñala piala la monar akevan ve sanene ve sanene, a ñasia, sane monar avilvan kala piaki ve sanene ve sanene, a ñasia, naña nakevanen kala pialo la naña amiyuñāen e pras ve sanene ve sanene, naga pa sa la nene.

⁵ Sur ne nanene kila le Varasi la apiun petan Yesu, asape “Komin ya ne kionñā nalogena la pe ataveve re ñelaga marua la na kieta nalotena na sumo la poli, naña kieta nasumonena la apian itania. Ana kionñā yar la nene, la akinana ga e limala namname lala, komin pe akevan ruru re limala la poli.”

⁶ Ana Yesu pisatañe la, pisape “Pe lelaga ga, navisawalena Aisea na sumo naga pisayu ruru

amiu ga yeririna na visokanen lala, naña naga mlologon visena naña Ntewa naga pisa, naña naga pisa sape

'Yeririna la nene la apatanonu ga e kiela visena lala,

ana kiela sitomena naga sike perinan inu pañisi wa.

⁷ *La amiyeluarnu ke, ana pe sur korena ga, komin pog naña la apian ke yeririna lala, apisa ke asape visena nene kiena ne Ntewa, ana peraga, visena nene naga pe kiela ga yeririna lala!' "* *Ais 29:13*

⁸ A Yesu pisa pan la, pisape "Amiu na amligan lua ke navisaluaena kiena ne Ntewa, apuarar ke ga ãelaga marua kiena ne yeririna lala ñarera.

⁹ Nanene naga pe memes re naña ayuñäen sanene poli, komin amiu añareran ga nataveveen ãelaga marua kiena ne yeririna lala, a nanagane amiu akila pano-o ãelaga marua ga la nene naga sike narui, miaslua make navisaluaena kiena ne Ntewa.

¹⁰ Amiu na ve asitom re asape amiu akila ke sanene, ana yoko nevisa kiamiu tai, naña amiu asumña akila ke. Amiu asitomñal li navisaluaen kiena Mosis, naña pisape 'Ologear arimonña amio anomña,' pisa ñena sape yar naña sa vis viowa van arimana amio anena, awemoñaria.

¹¹ Navisaluaena nene pisa ke sape ita monar tevisuar ruru ita kieta yermarua lua nene, ana amiu na akila pe tañena. Visae yar tai kilawoia sape kiena sur lañasia pe kiena ne Ntewa, ana pogos naña kiena yermarua lua kiela sur re poli, aim aviunia, yoko amiu avisa ya ne vania?

¹² Yoko amiu am̃areran vania, avisave ‘Toko, ve otañan re van lalua nene, vanon kieta ðelaga naga pisa sape sur naña tepisaarwoia pan Ntewa, ko na monar owar ga van kiena yar wa lala, ve otañan re van yar tañena lala.’

¹³ ?Amiu na apisa ke sanene, ana sanape na sanene? Amiu na asuñal ke m̃arera e kiamiu ðelaga marua, amiu amligan lelein ke pitove, ana kila ke naña ðelaga marua la nene naga kila ke navisaluaena kiena ne Ntewa pimi pe sur korena ga. Ana pe naga re ga nene poli, amiu akila ke m̃ena sur la moki sanene.”

Suri la naña kilia kila yaru naga pe namname e marana Ntewa

Matiu 15:10-20

¹⁴ Pisi na Yesu naga pio si yeririna lala pisape aimi veraga puna, ana pisa pan la, pisape “Amiu punu ga ayagogan ruru inu, monar aloge kilia kiau visena la nini.

¹⁵⁻¹⁶ Pe sur re tai naña teke vanuan yeririna, naña sa naga va loyuñã e losinena kilia kila naga namname e marana Ntewa. Ana suri ga la naña sike loyuñã e losinena yeririna, pogos naña molmolue e naga, kila naga ve namname e marana Ntewa.”

¹⁷ Ana Yesu petan yeririna la nene, pato si uñã, siraunia kiena nalogena la apim, apiun tania e kinas nen ðakaiwa naña naga pisayu pan la.

¹⁸ Ana Yesu pisape “?Ei, sanape, pona amiu m̃ena pe ðarimiu pike re sane la nene poli yo? Komin ya ne amiu m̃ena pe apisuluñar re sur nene poli, sane suri la naña teke vanua, sane kinanena lala, visae va loyuñan yeririna, sur la

nene naga tařatete kila yeririna viowa e marana ne Ntewa.

¹⁹ Nanene komin sur la nene pe tol re kiena sitomena poli, la apato ga e mēřena, ana la amolue akom sina ga e yepena.” Yesu pisa pa sanene narui, siraunia, yeririna la apisuluřar kiena visena, naga pisa kilale pisape pe kinanen re tai poli nařa yeririna monar lonia vena mekiki e marana ne Ntewa, ana kinanena la punu ga naga pon na kanena.

²⁰ Ana Yesu pisa mēna sape “A suri la nařa sike pa e yeririna rui, řisi na amolmolue e kiena malena, sur ne la nanene naga kilia kila yeririna ve namname.

²¹ Nanene komin e los nen yeririna, řelaga viowa la na amolmolue ke ea, suri ne la sane sitomen viowa, kolau, vinauena, nawemořaren yaru, navinaunen wona yar tařena,

²² sinenanen sur kiena yar tařena, řelaga viowa lala, visokanena, kilaroen navisaluaena, veveyuena, navisa kareen yaru, nawarwarena, navilaveena, a ve woweena.

²³ Pelaga viowa ne la nene amolmolue e los nen yeririna, sur la nene kilia kila yeririna ve namname e marana ne Ntewa.”

*Yesu mēnelua ninuna viowa e sira mēe tai
Matiu 15:21-28*

²⁴ Pisi na Yesu petan yo nene, pato tano garo pulkumali nae Taea. Ana pa e umā tai, sape kila sane yaru la ve akilia re asape naga sike e yo nene, ana naga tapolou řele ga sanene.

²⁵⁻²⁶ Ana sira tai sike e nene nařa kiena lus la kom ma Kris apitom, nařa la pe ape Yu re

poli, apitom asike yo naña Ponsoia lavisin Seria. Sira nene, narina tai na sira, ninuna viowa teke ea, pogos naña naga mloge asape Yesu naga sike e yo nene, naga pa kinaí e mialana, tagi pania sinenan pisape naga m̄nelua ninuna viowa ure vetan narin sira nene.

²⁷ Ana Yesu pisatañe pania, pisape “Ana sisi memes la na monar akinana ko ne wa. Pe memes re naña nowar plan kinanena kan sisi la vetan la, nevagan lokul la ea.” Naga pisa sanene komin e pogos nene, le Yu la na asitom ke asape la ga ape narina Ntewa, la apio kare ke la naña pe ape le Yu re la poli, asape “Amiu na ape lokul lala.”

²⁸ Ana sira naña pisatañe pania, pisape “Ko na opisa pe lelaga, Suñe, ana lokul m̄ena la apa ke lavisin lele na kinanen kan sisi kokan lala, akilia akan korkoro kinanena la naña kekapili sike e porotano.”

²⁹ Ana Yesu pisa pania, pisape “Ko na opisatam̄e kinas nen kiau visena nene po pañisi. Ana komin kion̄a visena nowo nene, nepisuluñar sane opiawa m̄arera e inu. Poga, okilia ovato si um̄a, ninuna viowa molue petan narum̄a naña ruí.”

³⁰ Pisi na sira naña pato si um̄a, pisu narina pa ruru ga tom̄a ga, tom̄a momalio m̄a pogaga e m̄ana tog.

Yesu kila ruru yar tai naña kiligana la poñe

³¹ Ana Yesu naga mligan yo nae Taea, pato kome pulkumali tañena tai, Saeton, ana naga pam sina ga e lapa nae Kalele, e lepas nae yo naña apio sape Pulkumali Lualima.

³² Ana la nae yo nene aþure yar tai pimi puna, vena naga ligan limana te ea, komin yar nene kiligana la poþe, mon mña mnenene ga.

³³ Ana Yesu þurelua yar nene petan yeririna moki la naþa asike lele nene, lalua apa li laa perina sane. Ana naga kian mrasilmana pa e pulkiligana lala, þisi na mla wasirina, plan e purmenen yar naþane.

³⁴ Ana Yesu kira pa ma e peni, pure kiena yalua keviu, pisa pan yar naþa e kiela visena, pisape “Epata.” Visena nene kana kinasia sape “Ovike.”

³⁵ Ana veraga ga, yar naþane kiligana la pike, a purmenena naga kululu sina, kila sane naga mloge ruru si sur lala, a pis ruru sina.

³⁶ Þisi narui na Yesu pisa mñareran pan la, pisape ve ava asunun re sur nene van yar taþena lala, ana silaga pogos naþa pisa sanene pan la la apa apisalelein ke pa e yo punu ga.

³⁷ Ana la apisawal-lelein sa nene, komin sinela la pula na pulan sur la punu ga naþa apisu Yesu kilia taþa. La apisasa ke asape “Yesu nene kila la naþa kiligala la poþe amloge si suria, a kila la naþa apis pule ga, akilia apis ruru sina. Aulai, yar nene kila sur la punu ga po na po pa þisi.”

8

Yesu pagan yeririna la miyuve manu vari
[4000]

Matiu 15:32-39

¹ Ana e pogos tai, pupia þina na yeririna la moki apimi sina pu Yesu, la asumña amio pano-o, viso kar la, ana la pe kala kinanen re poli.

Ana Yesu pio kiena nalogena la apimi lavisi puna, pisa pan la pisape

² “E, in na sineu miye ðina la nini paðisi, komin naða la asike amio ita legiena telu ðaro rui, kala kinanena la ðisi.

³ Ana visae netamãan la ava umã mãala naða pe akinana re sanene poli, pona laðas viso kar la e mrapa komsusa, kilamarala malko, komin laðasia mãala umã la sike koperina paðisi.”

⁴ Ana kiena nalogena la apisa pania, asape “? Ana tevagan yeririna la nene e yo korena nini sanape ne?”

⁵ Ðisi na naga piun tan la, pisape “? Amiu amlarar ke kilaparavi via?”

Ana la apisatamea “Olua ga þa.”

⁶ Ðisi na Yesu pisa pan ðina moki la nene, pisape “Amiu atotano e yo nene wa.” Naga mla kilaparavi la olua nene, pisa potena pan Ntewa panonia, ðisi na kawewowaia, kian pan kiena nalogena lala vena akianlelein van yeririna lala, ðisi na la apion tetain pan la.

⁷ Ana la amla mnea narin satin lua la ga e pogos nene, a Yesu mlotuwo mnea ga, pisa pan la sape ava avionlelein mnea ga van yeririna lala.

⁸ Ana la naða akinana pano-o, meþela la kawa, ana korkoro kinanena naða akanligania, aþar akon pa e karo olua.

⁹ Ana la naða akinana e pogos nene tol sane manu vari.

Ðisi na Yesu miila si ðina la nene aþasuþe si mãala umã lala,

¹⁰ ana naga pa e kiela wa, amio kiena nalogena lala, apetan yo nene, akusro apa atol yo tai naña kiena ki Talmanuta.

Yar keviu la ãasia asape avisu kile tai

¹¹ Ana e pogos tai, le Varasi lañasia apim asape agorua Yesu, asape atařali mñena ga naga, ana la apisa asape “Imimi sinemimin mesape okilali pupia kile tai van imimi, naña sane okila e puriu kawaena nae ma e peni.”

¹² Ana Yesu naga miyuveve pa kona, sa naña sinena maren la pa rui, naga pisatañe la, pisape “?Sanape na amiu na nanagane, sinemiun asape avisu kile tai ne sanene? Nepisa ke pe lelaga pan amiu, sane peraga, yoko kiamiu lus la na nanagane tařatete avisu kile tai.”

¹³ Ana Yesu pure petan la mligan la asike na, pa si e wa, pa kusro lapa komãasia pa lepas na vano.

Nasumonena nalotena la asuña akila ke ãelaga viowa la kapurulue ke

¹⁴ Ana pogos naña la apetan yo nene apa atol komãas nen lapa nene, amilan sane sinela pon nawararen kala kilaparavi ãasia amio la, ana la amlarar ga kilaparavi taaga teke amio la e wa.

¹⁵ Ana Yesu pisa visena tai pan la, pisape “Amiu monar avisuar ruru amiu, vanon is kiena ne le Varasi la amio Erot.”

Yesu pisa is nene, kana kinasia ãelaga viowa kiena ne nasumonena lala, ana nalogena la pe asitom kilia re poli.

16 La amloge visena nene, apisayu ke pan la, apisape “Pona naga pis sanene vanon ita pe toñar re kilaparavi laņas pimi poli yo.”

17 Ana Yesu kilia mña kiela sitomena lala, pñisi na pisape “?Amiu apisayu ke asape ita pe toñarar re kilaparavi komin ya? ?Sanape, amiu pe amloge kilia re poli, pona pe apisu kilia re sur la poli wa? !Sinemiu la mñarera pañisi wa!

18 Amiu kilamaramiu la sike na, ana apisu kilale re sur poli, ana kiligamiu la sike na, ana amloge kilia re sur poli. ?Pona amiu pe asitoñal re si sur la naņa nemiyuñæn pan yeririna la poli?

19 ?Pogos naņa nekiantetain kilaparavi lima nanua ne pan yeririna la manu lima naņane, akan pano-o meņela kawa, ana akon korkoro kinanena la nene pa e karo via?”

La apisatañea, asape “Imimi mokonkononia lualima taaga pa lua [12].”

20 Pisi na naga piun sina ga, pisape “?A pogos naņa lala manu vari nanua ne akan kilaparavi olua ga naņane, pñisi na amiu akon si karo via?”

Ana la apisatañea, asape “Imimi mokonkononia olua.”

21 Ana naga pis pan la, pisape “?Pogaga, ana sanapen nanagane? ?Amiu akiliali mña sur la nene, pona pere ke ga wa?”

Yesu kila ruru kilamara kata tai nae Petsaeta

22 Ana Yesu la apam atol pulkumali nene, Petsaeta. Ana la nae yo nene, a sumon kilamara

kata tai pimi puna, atagi pania vena tol ruru yaru nene.

²³ Ana Yesu tarar limana ne kilamara kata, sumon naga pano, la lua amiyuve kumali apa lepas na vano. Pisi na Yesu mla wasirina, mligan e kilamaran yar luwoka nañane, mligan liman tea, ana piun petania, pisape “?Sanape, ko na opisu ke suria, pona pere ke ga wa?”

²⁴ Ana yar nañane kirava, kira pisu suri lala, naga pisape “Ee, nepisu ke yar lala, ana nepisu la sa ga purpēs nen laki la amiyal ke na.”

²⁵ Ana Yesu mligan si limana e naga, yam luania, p̄isi na yar nene kilamarana pimi po ruruia, naga kilia kira pisu si suri lala, kira pisu la merarava po na po pāisi.

²⁶ Ana Yesu pisa pania, pisape “Yoko ko ove ova re si ovisu la nene gar uña, oto mesmes ga momña.”

*Pita pisawal sape Yesu pe Navisaarena lelaga
Matiu 16:13-20; Luk 9:18-21*

²⁷ Pisi na Yesu amio kiena nalogena la asape avato e narin pulkumali lala naña lavisin kumali keviu naña Sisaria Piliḗae, a e pogos naña la amiyal ke apato e yo nene, naga piun tan la pisape “?Amiu amloge ke yar la apisa ke asape in na ai?”

²⁸ La apisatam̄nea apisape “Laḗasia apisa ke asape ko na Yoane Nakeena sina ga, laḗasia asape ko na Elaisa, ḗasia asape ko na navisawalena tai naña na konua rui.”

²⁹ Ana naga piun si tan la, pisape “?A sanapen amiu, amiu na apisa ke asape in na ai?”

Ana Pita pisatañea, pisawalia pisape “Ko na ope kiamimi Navisaarena kemua lelaga.”

³⁰ Ana Yesu pisa mesmesun ga pan la, pisape “Pogaga, ana amiu ve ava avisawal lelein re sur nene van yeririna lala.”

*Yesu pisawal kiena marena
Matiu 16:21-28; Luk 9:22-27*

³¹ Ana e pogos nene, Yesu siar naña mlologon ke pan kiena nalogena lala, pisape Narin Yeririna, monar akila sur la ve moki naña naga loge viowagania, ana nasumonena kiena le Israel lala, amio yar keviu kiena yar wa lala, amio navianena navisaluaena, ñisi na la akovenlua naga. Ana Yesu pisa ñena ga sape la awemñar naga mare, ana e kiena legiena na telu, sumñalu sina, taulu marena.

³² Visena la nene, Yesu pisa meraravan po pan la, ana pogos naña Pita mloge, naga piolua Yesu, pis ñarera pania, sape visawoia, yoko monar ve ve sa re nene.

³³ Ana veraga ga Yesu pilon ñasina pimi pu Pita, kira pa pun kiena nalogena tañena la naña asike ne, pisaluñar ñarera pa Pita, pisape “! Yermare, oure vetan inu! Kionña sitomena nene naga pe sitomena kien yeririna ga, pe pe sitomen kiena re Ntewa poli.”

*Nalogena kiena ne Yesu naga monar sitom
korenan nasinenanena kiena*

³⁴ Ana Yesu pio p̃ina lala amio kiena nalogena lala, sape aim puna, pisa pan la, pisape “Yar naṓa sinenan sape taveve inu, monar sitom korenan nasinenanena kiena, monar kus kiena laki torovia, siraun inu.

³⁵ Yar naṓa sape taulu kiena malena, yoko kilaluia. A yar naṓa kilalu kiena malena vanon inu pona vanon kiau lologena wo, naga yoko tauluia.

³⁶ Visae yar tai war make sur na yomarava la punu ga ne, p̃isi na kusal mrapa na malena, naga pe taulu re sur wo tai poli.

³⁷ Ana kiena sur nowo la naṓa naga p̃aria, taṓatete ulmaran si kiena malena.

³⁸ Yeririna moki naṓa lus na nanagane, la ataṓa mlamulena viowa, la pe ape lelaga re pan Ntewa poli, la apiowa manene la, a la amawan ke yar taṓena la vanon inu a vanon m̃ena kiau visena. Ana siraunia, Narin Yeririna naga yoko wasuṓe sina ga, amio kiena navisi wa lala, amio naurarena kiena arimana, ana pogos naṓa avim, visae yar naṓa yepena mavin ke naga nanagane, naga m̃ena yoko yepena mavin yar nene.”

9

¹ Ana Yesu pisa m̃ena pan la, pisape “Lelaga nepisa ke pan amiu, yeririna laṓas na asumal ke e nini, naṓa p̃isi na taṓatete amare, vano-o tol pogos naṓa avisu nasuṓenena kiena ne Ntewa imi kate amio kiena pupia m̃areraena.”

*Yepena ne Yesu pimi pe tañena
Matiu 17:1-13; Luk 9:28-36*

² Siraun Legiena Orai ãarovia, Yesu ãere Pita amio Semes, a Yoane, la ga vari apa metava e pupia ravie tai. Asumã sane na, nalogena la telu nañane apisu ga yepena ne Yesu pimi pe tañena ke narui,

³ apisu ga mñana kulkota la pilavila ke, miyuwowo na miyuwowo, miyuve make ga sur na yomarava la naña miyuwowo.

⁴ Ana akirawal mñena navisawalena Elaisa amio yermarua Mosis akate, lalua asike asun ke amio Yesu.

⁵ Ana Pita pisa pa Yesu, pisape “Suñe, po pañisi naña ita tesumã ga e nini. Popon sa meyumãen silparpara ve telu se e nini, momã tai, mñana yermarua Mosis tai, a mñana ne navisawalena Elaisa tai.”

⁶ Pita pis wowe ga sanene komin lala sinela kurkur pañisi, amarau mñena ga, ana la amninue ga avisa yara.

⁷ Veraga ga lul tai pimi kalo la, amloge visena tai molue ea, pisape “Nanene naga pe Naruu, naña nekekan naga pañisi. Amiu monar alogear ruru naga.”

⁸ Nalogena la amloge visena nene, ana akirawe ke e yo nene, ãisi na pe apisu re si lalua naña poli, akirawal ga Yesu naga taaga sumãal sike amio la.

⁹ Pisi na lala apetan ravie nañane, apitom ke sina ga tano, a Yesu pis mñarera pan la, pisawo la pisape “Sur la naña Ntewa kila pan amiu apisuia,

amiu na ve ava avisasawal re van yeririna la nanagane, vano-o tol pogos naña Narin Yeririna mal sina ga e marena, e pogos nene narui amiu akilia avisawal van yeririna lala.”

¹⁰ Pisi na la amlogear visena kiena ne Yesu nene, amlarar ga pe kiela ga, ana la apiuyun ke sina ga petan la asape ya ne kinas nen kiena visena nene, naña pisape mal sina ga e marena.

Asitom ke asape Elaisa na lua sirau vim sina, ana Yesu sapa naga Yoane Nakeena pa rui

¹¹ Ana nalogena la telu nene apiun tan Yesu, asape “Sanape ne navianena navisaluaena la apisa ke asape ‘Elaisa naga monar wasuþe þesia wa, þisi na Navisaarena nene naga mñalivi?’ ”

¹² Pisi na Yesu pisatañe la, pisape “Naña apisa ke ne pe lelaga, Elaisa naga monar imi þesia vena kilaruruen sur la punu ga susumo, þisi na Navisaarena kilia vim. Ana nasiriena wa pisa ke mñena sur taþena tai naña pe asitomñal re poli, naña pisayu ke Narin Yeririna, sane naga monar vane nataþaliena la ve moki, ana yoko yeririna la asitom korenan naga viowa vaþisi ne.

¹³ Ana nevisa van amiu, Elaisa nene naga pimi ga na wa, ana yeririna la yepela mavinia. Sa naña Visena Wa pisa, ana la akila pa piowa ga pan rui.”

*Yesu mñenlua yermare petan teras tai
Matu 17:14-22; Luk 9:37-43*

¹⁴ Pisi na Yesu amio la telu nañane apa ke sina ga puna ne nalogena taþena lala, ana apisu na

pupia ãina na yeririna la akovivi la asike na, apisu navianena navisaluaena la agorua la ke amio la.

¹⁵ Ana pogos naãa ãina la akirawal Yesu pam ke sina, amilania, akekaran mēna naãa asape avisu naga, akiriri apim puna, atalopan naga.

¹⁶ Ana Yesu piun tan nalogena la, pisape “?E, amiu apisayu ke ya ne amio la nene?”

¹⁷ Pisi na lala yar tai pisa pania, pisape “Navianena, in na nepure kiau sisi yermēne nini pimin ko vena ovisulia, komin purkol mārera tai kila naga.

¹⁸ Ana pogos naãa kila naga, kovenlua naga pato tano e porotano, wasirina mlau piowa ga sa naãa siripu, karar ke mraluena, a yepena punu ga miokamarmare. Ana nepure naga pamin ko, ko na osu re poli, ãisi na nepiun ga tan kioãa nalogena lala vena la alen namēneluaen suri nene vetania, ana la amiyuãaen m̃a pano-o, akilapule ga yonia.”

¹⁹ Ana Yesu pisataãe la, pis pan la, pisape “? Amiu la nene, sanape na sanene? Amiu na pe asuãal mārera re nena e Ntewa. ?In na monar nesuãa nemio amiu vano tol pog ya? Nemiwon amiu pa rui. Ana pogaga, akus teras nene vim punu.”

²⁰ Ana la aãure pimi, ana pogos naãa purkol nene m̃al Yesu, kila yepen teras naãane miokamarmare, mloru pato tano e porotano mēke pilolon ke, kila wasirina naga mlau piowa ga sa naãa siripu.

²¹ Ana Yesu piun tan ariman teras naãane, pisape “?Ana purkol nene siar kila sanene pogwai?”

Ana arimana pisatam̃ea, pisape “E, sur nene siar na konua konua rui, pogos naña pe sisi ke ga wa.

²² Ana pimi tol nanagane, yam moki rui naña sur nene kila ke naga mlolor pa e kapi po pito e puluwii. Sur nene kila kare ke ga naga pañisi, sape kilañaria, ana sa ko na okilia okila sur yan tai, imimi mepiun tan ko, awis, ko na sinem̃a ye imimi, oiila imimi komin narimimi nini!”

²³ Ana Yesu pisa pania, pisape “Nemloge ko na opisa sanene, osape sa in na nekilia nekila. Ana nepisa pan ko, visae ko na olelaga ga, okilia okila sur punu ga.”

²⁴ Ana ariman teras nañane pio verakorena ga pa Yesu, tagi pania, pisape “Nemlelaga tekak ga, ana pe nemlelaga toroki re poli wa. Awis, ko na oiila inu vena kiau nalelagaena vim ve keviu laa sane wa.”

²⁵ Ana pogos naña Yesu pisu ãina na yeririna la apim moki manene la akovivi la, ana naga pis pa purkol naña teke e sisi yerm̃ene nene, pisape, “Ko yermare na kiliga poñe, a na plapur, nepisa memes ga pan ko, omolue vetan naga nanagane, ana ve oimi re si loyuma e naga pogos tai.”

²⁶ Ana yermare nene ki viowa keviu, kila yepen sisi yerm̃ene nañane miokamarmare pano-o piowa ga rui, ãisi na molue petania, pure pano. Ana yepen yar nañane malumu ga m̃eke, sa ga naña naga mare pa rui, yar la naña asike apisu ke la apisa ke sa nini, asape “Ke, teras nene mare pa ãisi rui.”

²⁷ Ana Yesu tarar limana, tarlua sum̃alu, ana teras nene sum̃al ruru ga sike.

²⁸ Ana siraunia, Yesu pato si umña, a e pogos nene, naña naga taaga sike, kiena nalogena la apim, apiun tania, asape “?Sanape ne imimi na meñenelua ðele yermare petan teras nene?”

²⁹ Ana Yesu pisa pan la, pisape “Yermare la ne sanene, la amñarera pañisi, ana leniena ga kilia mñene plan la.”

Yesu pisawal sina ga kiena marena

Matiu 17:22-23; Luk 9:43-45

³⁰ Ana Yesu la apetan yo nene, apa akom ga likan yo na e Kalele, ana e pogos nene, Yesu pe sinenan re sape yeririna la akilia suri la naña naga kila ke poli, a e mñena yo la naña apa ke ea.

³¹ Na nene komin naña pian ke kiena nalogena lala e pogos la nene, a naga pisa mñena ga ke pan la, sape “Lavisi mñena narui naña aligan Narin Yeririna va e liman yar la naña awemñar naga mare, siraunia e legiena na telu, ðisi na Ntewa tamalia sina.”

³² Ana kiena nalogena la pe amloge kilia re sur la naña Yesu pisayu ke ne, ana la amaraun mñena naviun ruruen si tania.

“?Yar ane to metavan make yar tañena lala?”

Matiu 18:1-5; Luk 9:46-48

³³ Ana siraunia, pogos tai la apam atol si Kapeneam, apa loyumña e yumña tai, ana Yesu piun tan kiena nalogena lala, pisape “?Amiu na akawe amiun ke visena ya naña e mrapa?”

³⁴ Ana la pe apisatamñe re poli, komin naña lala amiyal ke mrapa apami, apis ke pan la, asape lala

ane naga to metavan make la, po miyuve make la ga.

³⁵ Pisi na Yesu totano, ana pio kiena lualima taaga pa lua apim lavis puna, pisa pan la, pisape “Visae amiū yar tai naga sinenan sape vim sumo, pona sinenan sape kiena kia to p̄esia, pogaga, naga monar kila naga imi maro, to vatanon la make ga, naga monar vim ve yar nayum̄aenen yum̄aena kiena ne yar taḡena la wa.”

³⁶ Ana Yesu pio narin sisi tai naḡa sum̄a ga pimi puna, mligan su likan la, ana tararia, pisa pan la, pisape

³⁷ “Yar naḡa kiena sitomena pato ga tanon inu, ana kekarān na kilaen wo van nisisi tai ne sanini, nanene sane naga kekarān inu ke pa narui. A yar naḡa kekarān inu sanene, pe kekarān inu re ga ne po, kekarān m̄ena ke pa naga naḡa mliganu nepimi.”

“Yar naḡa pe pisaluḡar ita re poli, naga miila ita ke”

Matiu 18:6-9; Luk 9:49-50, 17:1-2

³⁸ Ana nalogena naḡa Yoane pisa pa Yesu, pisape “Navianena, imimi mepisu yar tai, naḡa naga m̄ene plan ke yermare lala, m̄ene plan la ke e kioḡa kia. Ana yar nene na, pe mekilia re naga poli, naga pe ita yar re tai poli, ana imimi mepisaluḡaria.”

³⁹ Ana Yesu pisa pan la, pisape “Peraga, amiū ve avisaluḡar re naga. Visae yar tai sane pe lelaga, kila ke yum̄aena keviu la e kiau kia, ana

yoko naga tařatete si visanena kare kiau kia pogos tai.

⁴⁰ Yar nařa pe pialuřar ita re poli, miila ita ke ne.

⁴¹ Inu nepisa ke pe lelaga pan amiu, visae yar tai kilia sape amiu akus ke kia kiena ne Kristo e amiu, naga la piala na wii tai van amiu amunia, yar nene naga yoko tařatete kilalu kiena nalaena nowo nařa yoko tol sirau.”

Natařaliena lala

⁴² Ana Yesu pisa mřena ga, pisape “A visae yar tai naga kila narin sisi tai ne sanini ve suřal mřarera re e inu, yar nene yoko tol nakoena tai ne mřarera laa sane taulu nařa sa aviar pupia kilavaru tai e kolmekina, akuan naga talilu e lowe memaena.

⁴³⁻⁴⁶ Visae lumořa tai pona lařa tai nařa kila ko na pe osuřalu mřarera re si e in poli, popon manene ga otelua vano. Visae ko na ote plan řelaga naviowaena vetan kiořa malena sanene, řisi na okilia ova loyumořa e malena, a sa ova loyumořa e malena nařa komřas nen lumořa tai po lařa tai kovio pa rui, nanene naga pogaga ne. Ana piowa vařisi visae yepemřa la asuřa ga woga ga, řisi na akuan ko ova e kapi nařa tařatete mare pogos tai.

⁴⁷ Ana visae kilamaramřa pona suri ya si tai e malena kiořa nařa kila ko pe osuřalu mřarera re si e inu poli, popon manene ga osiplania. řisi na okilia ova loyumořa e nasuřenena kiena

ne Ntewa naþa sane narin sur tai nene kovio petan ko, na nene naga pogaga ne. Ana piowa ga vaþisi visae kilamaramña luoka pona kioṃa þelaga viowa tai suṃa ga, þisi na narin sur ga la nene aure kioṃa malena wetelu va e kapi e lele naloge viowaena,

⁴⁸ naþa kapi nene taþatete þisi pogos tai, sisu la na akakarlue ga yepenña.

⁴⁹ “Sa naþa kururu sive naga kila kinanena ponos taþatete kona, yoko Ntewa naga ligam kapi e yar lala vena kekan plan kororaki la naþa e kiela malena lala.

⁵⁰ Ana tepisu ṃena sane kururu sive kila kata kinanena naga kiki, ana visae kana ṃareraena kovio, taþatete si kila kiena yuṃaena narui. Ana amiu monar ataṃan kururu sive kiena ne Ntewa yuṃae lue ga e amiu, vena kiamiu malena naga ve kona re, a vena kiamiu þelaga la kiki, naþa sane suṃarena sike amio amiu silaga.”

10

*Yesu pisayu sanape naþa yaru mligan lua wona
Matiu 19:1-12; Luk 16:18*

¹ Ana siraunia, Yesu mligan Kalele ana pa metava e lepas nae Yutea, kome wii nae Yortan lepas na vano. Ana þina lala apim ke sina ga puna e pogos nene, ana sa naþa naga kila ke silaga, pian la ke e sur la moki.

² Ana Varasi ṃena ga þasia asike e pogos nene, apimi puna ne Yesu, apisape akilali sina ga naga, la apiun naviunena tai pania. La apisape “?Kieta

Navisaluaena pisa ya ne e lepas nen ðelaga naña visae yaru mligan lua wona? ?Ositom sanape, mesmes ga naña yaru kilia kila sanene, pona pe mesmes re poli?”

³ Ana Yesu piuntamē la, pisape “?Ana Yermarua Mosis pialua ya ne e kiena navisaluaena rui?”

⁴ Ana Varasi la apisape “Mosis pisawal navisaluaena tai naña naga tamānia sape yaru kilia la lumāki naliganluaena tai van wona, vena ligan lua.”

⁵ Ana Yesu pisatamē la, pisape “Lelaga, ana Mosis siri visena nene vanon ga naña amiu þarimiu la mārera paþisi, suri nene kila naga tamānia sape akilia aligan plan womiu lala.

⁶ A siaria e nasiiena naga pe sa re nene poli, komin Visena Wa kiena ne Ntewa pisa sape ‘E purþesia, Ntewa sii yeririna, yermēne a sira.’

⁷ Ana visena taþena si tai, naña pisape ‘Vanon suri nene, þisi na yaru ligan arimana amio anena, naga va iakol amio wona,

⁸ ana lalua aimi ave taaga ga narui.’

“Nanene kila sane lalua ve ave lua re sina ga, aimi ave taaga ga narui.

⁹ Ana sur ya naña Ntewa vilolaria pimi taaga, pe mesmes re naña yaru kilapure si poli.”

¹⁰ Ana pogos naña lala apa si loyuma, kiena nalogena lala apiun sina ga tania e lepas nen visena la naþane.

¹¹ Ana Yesu pisa mesmes ga pan la, pisape “Visae yaru tai ligan lua wona, þisi na va ure

si sira taḗena, Ntewa pisu sane yaru nene naga taḗa ke pa kolau rui, naga kila kare sira naḗa pe wona nasumo.

¹² Ana visae sira tai ure matan wona na yermene, va pu yermene taḗena, naga mēna nene Ntewa pisu sane kolau.”

Yesu pisa ruru sisi lala

Matiu 19:13-15; Luk 18:15-17

¹³ Ana laḗasia akus narila la apimi pu Yesu, vena naga ligan limana te la, ana nalogena la apisua, apisi m̄arera pan yeririna la nene, apisalup̄ar la.

¹⁴ Ana pogos naḗa Yesu pisuia, pe kekaran re nena naḗa kiena nalogena la amiyum̄aen sanene poli, naga pis pan la pisape “Amiu ve avisalup̄ar re sisi la nene, ataḗan la ga aim pun inu, vanon naḗa sisi lala, la na sa ga yeririna la naḗa asike loyuma e nasuḗenena kiena ne Ntewa.

¹⁵ In na nevisa ve lelaga van amiu, yar naḗa sinenan ke sape va loyuma e nasuḗenena kiena ne Ntewa, naga monar kilia sane naga sa ga sisi kokan tai, naga taḗatete kila sur tai vena kus nasuḗenena kiena ne Ntewa e malena kiena.”

¹⁶ Ana Yesu kutarar sisi la nene e limana, mligan limana te ḗarila pisa ruru la.

Yaru m̄ee tai naḗa kiena sur moki

Matiu 19:16; Luk 18:18-23

¹⁷ Ana e pogos naḗa Yesu siar mial pa ke narui, yaru m̄ee tai kiriri pimi kinai tano puna, piun tania, pisape “?Navianena Nowo, in na monar

nekila yuññaena wo ya, naña kila ñisi na netol malena naña ve uro re?”

¹⁸ Ana Yesu pisa pania, pisape “?Vanon ya ne opiun tan inu sanene, osape in na nepe Navianena Nowo? Pe yar re tai po poli, Ntewa ga naga taaga po.

¹⁹ Ana ko na okilia mña kiena navisaluaena la naña monar ologear la, naña apisa ke asape, ve owemnar re yaru mare, ve otaña re kolau, ve ovinau re, ve ovisokan re, ve okilakewean re yaru, ko ova tanon arimomña amio anomña.”

²⁰ Ana yaru mñee nene pisa pania, pisape “Navianena, navisaluaena la naña opisa ke ne, siar pogos naña nepe sisi ke ga wa, nesumña nemlarar make punu ga rui pimi tol nagane.”

²¹ Ana Yesu kira pisu mña sane pano-o, kekaran naga vanon kiena visena nene pañisi, pisa pania, pisape “Sur taaga teke ga wa naña ko na okila re poli wa. Ko ovano, owilwilin plan make kionña sur la punu ga, owar kana kilavaru nena, ova oviovionia van yaru la naña pe kiela sur re poli. Visae ko okila sanene, ñisi na kionña suri wo lala ve moki vañisi ma e peni. Ko, ova okila, siraunia oimi otavevenu.”

²² Ana pogos naña yaru mñee nene mloge visena nene, kila naga milan karea, sinena piowa pañisi, vanon naña naga kiena sur la moki manene laa. Ana naga pure matan Yesu.

*Yaru naña kiena sur moki, naga mñarera laa naña va loyumña e nasuñenena kiena ne Ntewa
Matiu 19:23-30; Luk 18:24-30*

²³ Ana Yesu kira pisuveve kiena nalogena lala, pisa pan la, pisape “!Nevisa ruru van amiu, visae

yaru tai naña kiena suri moki, sinenan pisape va loyuña e nasuñenena kiena ne Ntewa, suri nene na m̃arera towe m̃a naña!”

24 Ana kiena nalogena lala amilan visena kiena ne Yesu nene pañisi, naga pisa si pan la, pisape “Pe lelaga naru la, navaen loyuña e nasuñenena kiena ne Ntewa naga m̃arera na m̃arera.

25 Ee, nevisa van amiu, naña kamel tai naga va warpoyo e pulus nen nitil, nanene naga m̃arera vañisi ne, ana visae yaru tai naña kiena suri la moki sinenan sape va loyuña e nasuñenena kiena ne Ntewa, naga m̃arera laa na wa.”

26 Ana pogos naña nalogena la amloge visena nene, amilan pañisi, apisape “?Suwala, ana visae ve sanene, ñisi na ane kilia tol namalena nene?”

27 Ana Yesu kirava pisu la, pisape “Ee, lelaga naña yaru tañatete tamalia yaru, ana Ntewa ga kilia kila make suri punu ga.”

28 Ana Pita sinenan sape vis, pisape “?Ana sanapen imimi? Imimi memligan make kiamimi sur la rui, ana metaveve ko.”

29 Ana Yesu pisa pan la, pisape “In na nepisa ke pe lelaga pan amiu, yaru a naña visae ligan m̃ana uña, pona wenla pona vinena, anena pona arimana, narina pona kiena porotano, ana visae naga ligan sur la nene vanon ga inu, a vanon kiau lologena wo,

30 ñisi na naga warmarana sina ga kiena suri la naña mligania, kilia tol sina ga ve ponotia tai. E yomerava nini, yoko tol sina m̃ana uña la, wenla la, amio vinena la, anena la amio narina la, a porotano la, a amio sur la nene, yoko tol pog

m̃arera ve moki, naṗa yaru la sinela kar m̃ena ga. Ana metavan sur taṗena la nene, e pogos naṗa imi, yoko tol m̃ena malena naṗa taṗatete ṗisi.

³¹ Ana yaru la moki liu naṗa asike metava, ṗisi na avito tano, ana yaru la naṗa asike tano, ṗisi na la ava metava.”

Yesu pisawal kiena marena yam telu narui

Matiu 20:17-19; Luk 18:31-34

³² Ana Yesu lala amlulu ke mrapa, apa ke metava ma Yerusalem narui. Ana Yesu naga sumon ke kiena nalogena la, la sinela kurkur paṗisi naṗa apisu naga sumon la apa Yerusalem, komin la akilia ke asape yeririna nae yo nene la sinela kari ke paṗisi. Ana li taṗena la naṗa asurau ke ga wa, la m̃ena asum̃a amarau lili m̃aga. A naga piolua ga kiena lualima taaga pa lua apimi puna, pisawal si pan la sanape naṗa ṗisi na akila viowa vania gar Yerusalem.

³³ Naga pisayu pan la, pisape “Amiu ayagoga ruruia. Nanagane ita tepa ke Yerusalem narui, naṗa ve ve piavi re, ṗisi na aligan Narina Yeririna e limana ne yerkawa lala kiena ne yaru wa lala, amio navianena navisaluaena m̃ena lala, ana ṗisi na la nene aliṗere naga avisave ṗisi na monar mare. Ana siraunia, aligan naga e limana ne la naṗa pe ape le Yu re poli,

³⁴ naṗa ṗisi na la nene akirakirai viowa vania, avilasirkon marana, ṗisi na akoa naga vano-o awem̃aria. Ana e kana legiena natelu, ṗisi na mali sina.”

Semes amio Yoane, apiun sur tai tan Yesu

Matiu 20:20-23

³⁵ Ana amiyal laa apa sane, ĩisi na narina ne Sepeti lalua nene Semes amio Yoane, apimi puna ne Yesu, apiun petania, apisape “Navianena, imimi lua mesape sur ya naĵa meviun tan ko nagane, mesape otamĵan van imimi.”

³⁶ Ana Yesu pisatamĵe la, pisape “?Ana amiu lua sinemiun asape in na nekila ya ne van amiu?”

³⁷ Apisatamĵea, asape “Imimi lua sinemimin mesape otamĵan sanini: pogos naĵa ko na ovim ove ĵarin suĵe na yomerava nini, ĩisi na mekilia metotano memio ko e kionĵa yo wa metava lavisin ko, tai te lepas na ĵamarua, a tai e lepas na ĵamĵeli.”

³⁸ Ana Yesu pisatamĵe la, pisape “Amiu pe akilia re sur ne apiun ke ne poli. ?Sanape, amiu lua nene asitom asape atorokin naĵa tomunpae e piala naloge viowaena nene naĵa in na monar nemun ea? ?Ana amiu asitom ke asape amiu akilia atol nakeena e wii naĵa akee in ea?”

³⁹ Lalua apisa pania, apisape “Ee, imimi lua metoroki.”

Ana Yesu pisa pan la, pisape “Ee, lelaga naĵa ĩisi na amiu amun mĵena ga e mĵau piala naloge viowaena nene, ana pe lelaga naĵa atol nakeena e wii nakeena naĵa akeenu ea,

⁴⁰ ana sur nene naĵa amiu lua apiunia, asape atotano amio inu e lepasneu luwoka, sur nene naga pe kiau re naĵa nela van amiu poli. Yo la ne sanene, kiena ga la naĵa Ata kila ruru pe kiela, pisaar ĩisi rui pisape ĩisi na atotano ea.”

Narin Yeririna pimin vena yuñae kiena ne yeririna lala

Matiu 20:24-28

⁴¹ Ana pogos naña nalogena tañena la lualima nene amloge sur nene, naña wenla lalua nene Semes amio Yoane apiunia, la sinela kar lalua.

⁴² Ana Yesu pio la apimi puna vena naga visi van la, ana pisape “Amiu akilia ruru ðelaga kiena ne yaru la naña pe amlelaga re e Ntewa poli. Tepisu sa naña suþe lala amio yerkawa lala na yomerava, la sinelan asape amãreren yaru tañena lala asu vatanon la silaga.

⁴³⁻⁴⁴ “Ana amiu kiau nalogena lala, kiamiu ðelaga monar ve ve sa re nene. Visae amiu yar tai sinenan sape imi ve yerkawa tai pona ve kiamiu nasumonena tai, kana mrapa nena sanini: yaru nene monar imi ve sa ga yaru na yuñae kiamiuena tai.

⁴⁵ Narina Yeririna naga kila sanene þisi rui, naña pe pimin re vena yar la aiila naga poli, naga pimin naiilalaena, a vena tañan kiena malena nawulplanen yeririna la ve moki.”

Yesu taña ruru kilamara kata tai

Luk 18:35-43

⁴⁶ E pogos nene, Yesu amio kiena nalogena lala apim asike garu Seriko, ana pogos naña amligan yo e pulkumali nene apano, ana yeririna la moki paþisi ataveve la. Pog naña amiyal ke apano, ana kilamara kata tai toña tano e isinen mrapplepa. Yar nene, arimana kiena kia Timeas, ana apio kia kiena ne narina asape Patimeas. Patimeas

nene, totano e mrapplepa legiena punu ga, pion ke pan yar lala sape akuan narin kururu varu vania vena iilaena kiena malena.

⁴⁷ Ana pogos naña mloge apisape Yesu nae Nasaret mial ke e mrapplepa pimi, p̄isi na naga pion ke, sape “!Yesu-o, ko lus kiena ne Tepet, nesape ko sinemña ye inu wa!”

⁴⁸ Ana yaru tañena la apisin sinemimien pania, asape “Ee, ve om̄aaga re.”

Ana naga pion manene la pavini, sape “!Suñe-o, ko lus kiena ne Tepet, awis, nesape sinemña ye inu.”

⁴⁹ Ana Yesu panar suñalu su mrapa e yo nene, pis pan yeririna lala, pisape avio yar nene vim lavis puna, ana lala apa apisa pan kilamara kata nañane, asape “Welu.” Ana naga sape “Pasa.” Ana lala apisape “Ve ologe re viowa. Yesu nañane sape oim puna wa. Ko osuñalu, ita.”

⁵⁰ Ana yaru nene kuanlua m̄ana kulkota, suñal veraga ga, pimi puna.

⁵¹ Ana Yesu piun tania, pisape “?Ko na sinom̄an osape nekila ya ne van ko?”

Ana naga pisatañea, sape “Suñe, awis, in na sineun nesape kilamarau la imi wo, vena nekilia nekirava.”

⁵² Ana Yesu pisa pania, pisape “Pogaga, ko na okilia ova si um̄a mom̄a. Kiom̄a nalelagaena ga kila ko opim omloge po narui.” Ana naga pisu ruru ke ga suria e pogos nene, ana mial taveve Yesu e mrapa apano.

11

Yesu pimi tol yo naña Yerusalem

Matiu 21:1-11; Luk 19:28-40; Yoane 12:12-19

¹ Nanagane, Yesu lala apam lavisin Yerusalem narui, ana la añalivi e narin pulkumali lalua sumo, kiela kia Petpas amio Petani, naña sike e yepas nen kunus nene naña la apio asape Kunus Na Purolip Lala. Ana Yesu miila kiena nalogena la lua, pisape

² “Amiu lua ava e pulkumali na gare, a memes ga e pogos naña ava loyuma ea, ñisi na avisu narin togki tai, naña amñatear teke na, pe yar tai totanoli re e wosia poli wa. Ana aluñarlua aure imi pun inu e nini.

³ Ana visae yar tai vis van amiu vanonia, viunia visave ‘?Amiu akila sanene vanon ya?’ ñisi na avisa ga vania, avisave ‘Suñe na sinenan sur mal nini vena va kila kiena yumaena tai wa, ñisi na naga ligana wasuñe sina ve ve piavi re.’ ”

⁴ Ana ñisi na nalogena lua nene apano, añal narin togki nañane, apiaria teke na sike ga vanua e mratava na yuma tai lavisin ga mrapplepa. Pogos naña asape aluñarlua kana kilika,

⁵ ana lala naña asike e yo nene apiunia, asape “?Amiu akila ke ya ne, amluñarlua ke kana kilika na ya ne?”

⁶ Ana la apisa pan la visena la naña Yesu pisa ruru pan la, naña sane avisa van yar la nene, ana la atañan asape akilia aure togki vano pogaga.

⁷ Pisi na lalua añere togki nene pimi, añatetae mñala kulkota lala e wos nena, ana Yesu pa totano metava ea.

⁸ Ana yar la moki liu naþa aþatetae mala kulkota lala suvileviles nen mrapplepa, ana yaru laþasia apa ate mamela lala pitomi aþatetae mena ga, vena togki yal ea. Sanene narui, akila sa naþa la apatanon Yesu sa naþa pe pupia þarin suþe tai.

⁹ Ana la amial ke apano vena ava loyuma Yerusalem, ana þina na yeririna la naþa asumon Yesu, amio la naþa asiraunia, asma apiovion manene sanini, apisape

“!A ke suwala, pona po! !Teyeluar naga!

!Ntewa na mava, ko ovisa ruru naga nene naþa pimi e kioma kia!

¹⁰ !Ita tekekan paþisi nasuþenena kiena ne kieta yermarua Tepet naþa pimi ke! !Amiu nae mava peni, amiu mena ga ayeluarial!”

¹¹ Ana Yesu pa loyuma Yerusalem, a pa tol Yuma Wa mana ne Ntewa. Ana pa loyuma, pisuveve yo lala, a sur la punu ga naþa amiyumaen ke ea, pano-o mrae naga pato ke tano narui, naga pure kiena lualima taaga pa lua, apetan si pupia kumali naþani, apa amono gar Petani.

Purlaki tai naþa pe tau re poli wa

Matiu 21:18-19

¹² Ana yemlagi kolulagi la amligan si ma Petani aþasuþe sina vena ava Yerusalem, ana Yesu mloge sane viso karia.

¹³ Naga kira pa e is nen mrapplepa, maal purpik tai sike, ana naga mial pa lavisinia vena war mras laþasia. Ana pogos naþa pimi pisuia, purpik nene mas ga moki, ana pe mras su re e poli, komin pe kana pog re poli wa.

14 Ana Yesu pisa pan purpik nene, pisape “Ko ove owar re si mrasnoṃa pogos tai vena yar la akilia akania.” Ana kiena nalogena ṃena la amloge ke naṓa naga pisalele kare laki na sanene.

Yesu ṃene plan la naṓa asuṃa aṓiliwilin ke suri e Yuṃa Wa ṃana ne Ntewa

Matiu 21:12-17; Luk 19:45-48; Yoane 2:13-22

15 Ana Yesu la apa atol si Yerusalem narui, lala apa sina ga loyumuṃa e Yumuṃa Wa ṃana ne Ntewa. Ana e pogos nene naga pisa sane yar la moki liu naṓa asuṃa e yepas nen yumuṃa nene, la asuṃa akila ke ga yumuṃaena natauluen kilavaru lala ea, ana yar la mok liu naṓa apul ke sur la naṓa aṓiliwilin ke ne. Ana naga pe kekaran re nenaga, pa ṃene plan la, kawepu narin varvara kiena ne yar nakeueen varu sa le Rom la pimi ve sa le Yu la, nakilaena nalaena. A naga koantetain lele na totanoena kiena ne la naṓa apuliwilin ke kupa nakuṓaṓaena lala.

16 A naga pisawo ṃena ga yar la naṓa sinelan ke asape awar kiela sur na yumuṃaena la ayal akom likan yepa na Yumuṃa Wa nene.

17 Ana naga pisa pian la, pisape “?Sanape, amiu pe akilia re asape Ntewa pisa e kiena Visena Wa, sape

‘Pisi na la avisa ṃau Yumuṃa Wa avisave naga yumuṃa nalotena kiena ne yolai punu ga e yomarava wetelu’?

Ais 56:7

‘Ana nanagane na amiu akepu pimi sa ga ponovi ṃana yaru na vinauena la narui.’ ”

Ser 7:11

¹⁸ Ana pe piavi re nena, yerkawa lala kiena ne yaru wa lala, amio navianena na navisaluaena lala, amloge sur la naña Yesu kila e Yumã Wa m̃ana ne Ntewa, ana la sinela kar pañisi, asape akila suriania. Ana amaraun Yesu, pe akila re si poli, vanon apisu kilale naña yeririna la akekaran naga pañisi, asumã amilan ke kiena navianena wo lala.

¹⁹ Ana pogos naña mrae pato pa tano narui, Yesu la apetan ke sina ga yo naña Yerusalem.

*Purpik naña pe tau re poli, mare make ga
Matu 21:20-22*

²⁰ Ana kolulagi, la añasuþe apa ke si Yerusalem, ana apisu purpik nañane, m̃as la miaiai make nena rui.

²¹ Ana Pita sitom̃al si visena kiena ne Yesu, pisa pania, sape “Suþe, opisus ke ne! Purpik naña opisanena kare nakoneva, nagane mare rui.”

²² Ana Yesu pisatam̃ea, pisa pan la, pisape “Amiu punu ga monar aviawa m̃arera e Ntewa.

²³ In na nepisa ke pe lelaga pan amiu, visae yar tai naña pe kiena sitomena peve lua re poli, a mlelaga m̃arera, ana visae suri ya naña naga visa, monar ve sanene narui. Visae naga vis va pupia kunus nene, visave ‘Osum̃alu otove, oula ova e sive,’ ãisi na monar ve sa ga nene.

²⁴ Nane nepisa pan amiu, ana sur ya ne ko na oviunia e kioãa leniena, visae olelaga m̃arera sane sur nene pe kioãa pa rui, ãisi na monar ve sa ga nene narui.

25-26 Ana e pogos punu ga naña visae alen, amiu monar asitom ruru mēna ga, visae kilapurpu tai teke e ko amio yar tañena tai, monar oviewo sumo wa, p̄isi na okilia osum̄alu okila kioñā leniena van Ntewa. Visae okila ve sa nene, yoko arimata nae ma e peni, naga mēna sitoñal ko, viewo kon kioñā mlamulena viowa lala.”

Nasumonēn le Israel lala sinelan asape avisaluñar Yesu

Matiu 11:23-27; Luk 20:1-8

27 Ana Yesu la añasuñe si apam atol Yerusalem, ana apa si loyūñā e kove na Yuñā Wa mñana ne Ntewa. Ana pogos naña amialoro ke loyūñā, yerkawa kiena ne yaru wa lala, amio navianena navisaluaena, a nasumonēna lala kiena ne le Yu la, apimi puna,

28 apiun tania, asape “Ko osum̄a okila ke sur la ne sanene e yo nini e kia kiena ne ai? Ana a si na pisa pan ko sape okila ve sanene?”

29 Ana Yesu pisatañe la, pisape “Pogaga, ana inu mēna nesape neviun naviunēna tai van amiu wa. Visae amiu avisatañe ruru kiau naviunēna nene wo, p̄isi na nekilia nevisawal van amiu sanape naña nekilia nekila ve sanene.

30 Ana kiau naviunēna naga sanini narui, sape: ?Nakeena naña Yoane naga kilamare ga nanua ne e yaru lala, naga pe sur tai naña Ntewa pisa pania sape naga monar kila, pona yaru ga la apisa pania? Amiu avisatañeli kiau naviunēna nene.”

31 Ana naviunēna nene kiena ne Yesu kila la agorua la narui, naña asum̄a apisa asape “?Pisi

na ita tevisa sanape na vania? !Tevisuaruruia! Visae ita tevisa tevisave nakeena nene Ntewa naga pisa pa Yoane, p̃isi na yaru nene viun si vetan ita, visave vanon ya ne ita pe temlelaga re e Yoane poli.

³² Ana ita taṓatete si tevisa tevisave nakeena kiena Yoane nene pe sitomena kiena yeririna ga lala, visae peraga, la sinela kar ita.” Yar keviu la amaraun visaena visen nene, komin akilia asape yeririna la nene amlelaga ke po m̃arera e Yoane p̃isi rui, asape naga pe navisawalena na lelaga tai kiena ne Ntewa.

³³ Ana kiela sitomena la ne sanene narui, kila apisataṃe Yesu sa ga nini, apisape “Imimi memninue ga.”

Pisi na Yesu pisa pan la, pisape “Visae sanene, inu m̃ena ga, taṓatete nevisa van amiu nevisave ane pisa pan inu sape nekila yuṃaena la ne sanene.”

12

Pakaiwa na li viowa la naṓa apisuar lokilkerep tai

Matiu 21:33-46; Luk 20:9-19

¹ Ana pogos naṓa Yesu suṃa pian la ke, naga pisayu ke ṓakaiwa pan la. ṓakaiwa tai na pisa sa nini, pisayu yerkawa tai, amio kiena lokilkerep. Yaru nene kila ruru kiena yo nene, kila kove m̃arera tai telivi piora ea, a kila kana lele navieplanen was nen kerep, kila m̃ena kana lele tai naṓa pa metava naṓa yaru kilia wiyu va se ea, vena kiravawoen lokilkerep nene.

“Ana e pogos tai, yerkawa nene sinenan sape yaloro re va e purvanua tañena tai, ñisi na mligan kana lokilkerep nene e limana ne yaru lañasia, vena ayuññaenia, aul vania.

² “Ana yerkawa nene pa suñña gare pano-o, ñisi na pisu kilale sane nanagane na pogos na mrakerep la marua narui. Ana mligan kiena yaru tai pa si puna ne la naña asike e kana lokilkerep nene vena war kiena kilavaru na mrakerep komñasia, naña la nene monar aul vania.

³ Ana pogos naña kiena yaru nene pano, ana yaru tañena la nene aña kare naga, añenelua sina naga pano, pe mla re sur tai poli.

⁴ “Ana yerkawa nene miila si kiena yaru tañena pano, ana la naña aña, ñar kuruta e ñarina, akila piowa pan naga pañisi, añenelua pa sina.

⁵ Pisi na naga miila ke sina ga tañena tai, ana añemoñar naga mare, siraunia, naga miila kiena yeririna moki apano, asula añemoñar la mña ga.

⁶ “Ana yerkawa nene pisu sane yar taaga sike narui, pe narina wawa naña naga kekaran pañisi, ana naga sitomveve pano-o, pisape ‘In na monar neligan ga naruu vano, vena monar avatanon naga.’

⁷ “Ana pogos naña yar viowa la nene apisu narina ne yerkawa nene pimi, la asuñña apismumun pan la, asape ‘Narina ne ke yerkawa naña narui. Yaru ke na nene narui, naña visae yerkawa kovio, ñisi na kus porotano nene sane ve kiena lalimana. Popon ita towenar mña

naga mare, ana ita ga tekilia tokus porotano nene ve kieta.’

⁸ Ana sanene narui atarar naga, añeñaria, akovenlua naga petan lokilkerep pa vanua.”

⁹ Ana Yesu piun tan la, pisape “?Pogos naña yerka nene yoko imi sina, ñisi na kila sanapen la naña amiyuñae ke e kiena yo nene? Yaru viowa la nene, ñisi na yerka nene imi weñar la, monar amare e ñelaga ñarera tai, siraunia naga ligan kiena lokilkerep e limana ne yaru wo tañena la ñasia.”

¹⁰ Ana Yesu pisa pan la, pisape “Visena tai teke e Visena Wa kiena ne Ntewa, pisa sanini pisape *‘Kilavaru nene, yaru na yuñanen yuñã lala apisa asape piowa ga, akoven rui, ana nanagane na, kilavaru nene pimi pe kilavaru wo na mrapun yuñã, ve nauararen yuñã ñarera.*

¹¹ *Ana sur nene, Ntewa ga kila, a mepisuia na po na po.’ ”* *Yauena 118:22,23*

“? Ana sanape, visena nene akilia pa rui, apuloli ñã pogos tai, pona peraga yo?”

¹² Ana pogos naña Yesu pisa pae ñakaiwa nene, yerka lala akilia naña naga suña pisa ke ga visena la nene vanon kiela ñelaga lala, ana sinela kar naga, kila narui sinelan asape auarar naga, ñisi narui na apisu sane yar la mokliu, amaraun la, amligan naga ñeke na añure apano.

*Sur kiena ne Ntewa, a sur kiena ne Sisa
Matu 22:15-22; Luk 20:20-26*

¹³ Ana yar keviu lala apa apisuveve sur nene, lala amligan Varasi lañas apimi, amio ñena

ga ðasia e ðegas kiena ne Erot, naþa apiunli naviunena m̃arera laþasia ve nataþalien Yesu ea, naþa sane naga visatañe þele ga.

¹⁴ Ana apimi puna ne Yesu, akila kotalia e visena wo lala, apisa asape “Navianena, imimi mekilia ko na ope lelaga kemua. Ko ope omaraun re yar tai poli, sane yar keviu, pona yar naþa to metava, po yar na sanape, ana ko osuñia apisalua ke mrapa memes kiena ne Ntewa pan la punu ga. Ana mesape meviunli tan ko, mesape kieta navisaluaena pisa sanape? ?Pisape memes ga naþa ita le Yu toul takis va Sisa, naþa pe þarin suþe kiena ne le Rom lala, pona pe memes re sanene poli?

¹⁵ ?Pogaga naþa toul takis la nene po peraga?”

Ana Yesu kilia m̃aga naþa la apiun kotalia ga, sinelan ke asape akila kare naga, ana naga pis pan la, pisape “?Amiu asuñia ataþalinu ke sanene vanon ya? Pogaga, amiu ala kilavaru tai imi vena nevisuvevelia.”

¹⁶ Ana amla tai pimi, akian pania, Yesu piun tan la, pisape “Ninun marana a ne teke e narin kilavaru nene? ?Ana kia na asiri teke ea, ane kiena kia nene?”

La apisape “Marana ne Parin Suþe Sisa nene, a kiena kia m̃ena ga.”

¹⁷ Ana pisa pan la, pisape “Pogaga, sur naþa kiena ne Sisa, monar ala va Sisa, a suri naþa kiena ne Ntewa, monar ala va Ntewa.” Ana pogos naþa amloge navisatañeena nene, amilan kare paþisi.

*La naŕa amare, ŕisi na amal sina
Matiu 22:23-33; Luk 20:27-40*

¹⁸ Ana siraunia, le Satusi laŕasia apimi puna ne Yesu, sinelan asape aviunli suri tai tania e lepas na sur tai naŕa la amlelaga m̄arera ea, asape sa yaru la naŕa amare, taŕatete amal sina e legiena maro. Vanon suri ne nanene apiun tan Yesu sanini, asape

¹⁹ “Navianena, sinemimin mesape meviunli tan ko sanape e visena tai naŕa yermarua Mosis siri pan ita nanua sumo. Naga pisa pisape visae yaru tai, mare tan wona naŕa sane pe narila re tai poli wa, ŕisi na wenla yaru nene monar talopa sina amio letano nene. Ana visae sira nene war sisi, akilia asikia e kia kiena ne arimana naŕa mare pa rui, vena kia nene mali m̄aga.

²⁰ Ana e pogos tai, wenla la olua. Kiela m̄earu talopa, ana naga mare petan wona, pe narila re tai poli wa.

²¹ Ana wenla nasiraunia ŕereleinia pe wona, ŕisi na naga m̄ena ga mare petania, pe narila re tai poli, a wenla na telu kila m̄ena ga sanene,

²² pano-o tol wenla na olua, la punu ga amarmare tan sira naŕa sanene. A siraun wona la punu ga naŕa amarmare, sira m̄ena ga nene mare.

²³ Ana ko ovisali sur nene: ?E legiena maro, pogos naŕa apisa ke asape ŕisi na yaru la amal sina, ŕisi na sira nene na ve wona ai, vanon naŕa naga talopa amio wenla la olua nene ŕisi rui?”

²⁴ Ana Yesu pisape “Peraga, kiamiu sitomena pa pe wowe laa. ?Pona kam na pe akilia re ya ne kila amiu ape wowe ke sanene poli yo? Vanon pe akilia re ya naña Visena Wa kiena ne Ntewa pisa ke poli, a pe akilia re mēna ya naña kiena nam̄areraena keviu kilia kila poli.

²⁵ Pogos naña yaru la amal sina, p̄isi na lala ave sa ga navisi kiena ne Ntewa lala ma e peni narui, ana p̄isi na ve akila re si suri nene naña natalopaena.

²⁶ A e lepas na malena si nene, kana visena tai teke e tusi naña Mosis naga siria, naña pisayu ke narin laki tai naña kapi kekania, naña Ntewa pisa pa Mosis sanini, pisape

‘Epraam, Aisak, a Sekop, in na nepe kiela Ntewa.’

“?Pona amiu na pe apuloli re visena nene pogos tai poli yo,

²⁷ ana in na nevisakilale van amiu vena kila ruru kiamiu sitomena lala. La telu nene la amare e yomarava nini nakonua rui, ana kas moki na moki p̄aro pa rui, ana Ntewa pisa ga visena nini na wa, naña sape naga pe kiela Ntewa. Sanene na kiena visena naga kana kinasia sape la telu nene la amare e yomarava, ana la amal ke ma puna na wa. Ntewa pe sinenan re sape kiena yeririna lala la ave yaru la naña amare poli, ana naga sinenan sape naga ve Ntewa kiena ne yeririna la naña amali.”

Navisaluena na keviu lua

Matiu 22:34-40; Luk 10:25-28

²⁸ Ana navianena na visaluena tai pimi sum̄alu sike e pogos nene, ana miyagogan ke le Satusi lala ataḗali ke Yesu, ana Yesu taulu la ga

e kiena navisatam̃eena wo lala. Ana navianena nene, naga sitom sape naga towe lai viun va Yesu, pisape “?E kieta navisaluaena lala, nape naþa keviu, miyuve taþena lala?”

²⁹ Ana Yesu pisa pania, sape “Visena Wa pisa sanini, pisape

‘Yeririna nae Israel, amiu ayagoga.

Ntewa na mava, kieta Ntewa, naga taaga pe Ntewa na mava.

³⁰ Ntewa na Mava naþa pe kioṃa Ntewa, ko na monar sinem̃a sia e losinem̃a wetelu, e kioṃa malena wetelu, e kioṃa sitomena wetelu, a e kioṃa puriukawaena wetelu.’

³¹ “Nanene naga pe navisaluaena þesia, a nalua nena naga pisa sanini, pisape

‘Ko monar sinem̃a si nalavis puṃa lala, okila wo van la, sa ga naþa ko sinem̃a si ko ke ga.’

“Ana pe navisaluaena re si tai poli naþa naga keviu taulu lalua nene.”

³² Pisi na navianena navisaluaena pisatam̃e pania, pisape “Lelaga ga navianena, ko opisa mesmesu ga. Ko opisa pe lelaga ga, osape yar keviu naga taaga ga, pe tai re si poli.

³³ Ana ko opis pe lelaga ṃena ga osape monar sineu si naga e sineu wetelu, e kiau nakiliaena wetelu, amio kiau puriukawaena wetelu, ana monar sineu si la naþa asike lavis pun inu, sa ga naþa sineu si in ke ga. Pe lelaga ga ne, e nakiravaena kiena ne Ntewa, visae nekila ve sa nene, nanene naga to laa metava, po manene laa taulu make nakuþaþaena lala naþa netaþa ke e ṃana Yum̃a Wa.”

³⁴ Ana Yesu mloge kiena navisatarĩeena naga po, pe manmarua po, ana pisa pania, pisape “In na nevisa van ko, sane ko ko na osike pa lavisi rui, ko na yoko ĩisi na ova loyũña e nasuĩenena kiena ne Ntewa na wa.”

Ana siraun e pogos nene, ĩisi na pe yar tai taĩali re si Yesu e naviunena la poli.

Navisaarena naga pe Ntewa kiena ne yer-marua Tepet

Matiu 22:41-46; Luk 20:41-44

³⁵ Ana siraunia, Yesu naga pian ke yeririna lala e Yũña Wa mũana ne Ntewa, ana naga towelai piun naviunena tai pan la. Naga pisape “?Nekilia mũaga naĩa kiamiu navianena navisaluaena lala apian amiu mũaga, ana nesape neviunlia, komin ya naĩa apisa ke asape Navisaarena naga monar mũalivi e lus kiena ne yermarua Tepet nene naĩa naga pe ĩarin suĩe sumo?

³⁶ Nepiun ke sa nene, komin nanua sumo, Ninuna Wa pimi e Tepet, kila naga pisi, pisape ‘Ntewa na Mava pisa pa kiau Suĩe, pisape

“Ko ototano e kiau lepas na ĩamarua, otomate mũa vano-o, ĩisi na neligan kioĩa nasinekar lala aimi ve sa narin takue na vilanvanen laĩa ea.” *Yauena 110:1*

³⁷ “E lele nene tepisu naĩa Tepet sumũa pio ke Navisaarena nene sape pe kiena Suĩe rui. ? Ana vanon naĩa Tepet pisa sanene, a sanapen naĩa amiu apisa ke asape Navisaarena nene naga molue ga e Tepet, ana naga pe kiena lus ga tai?”

Ana pupia ĥina naĥa asike e pogos nene, lala sinelan manene navianena kiena Yesu la ne sanene, la akekaran manene paĥisi.

Yesu pisi ĥarera paĥisi pan nasumonena lala nalotena

Matiu 23:1-36; Luk 20:45-47

³⁸ Ana e pogos nene naĥa Yesu naga pian la ke, pian lan la ke ĥena ga e ĥelaga na yeluarlaena kiena ne kiela nasumonena lala. Naga pisape “Amiu avisuar amiu e navianena navisaluaena lala. Lala aplave ke paĥisi e ĥala kulkota piayavi lala, a pogos naĥa visae la ayaloro e lele na wilwilinena, sinelan asape yaru lala monar avatanon la, a avio ruru la avisave ‘!Navianena, pokolulagi!’

³⁹ A e pogos na ĥaĥagena lala, a loyuma e nalotena ĥena ga lala, la sinelan naĥa silaga asape atotano ga e lelen yerkawa lala. Amiu apisu kilale la ke narui, ne?

⁴⁰ Ana lala asuma aĥure piavin ke kiela leniena la paĥisi, ana apisokani ke ga ne, vanon naĥa e ke e pogos nene, lala asuma akila kotalia ke letano la, vena avinaun kiela suri lala. Ana vanon suri ne nanene, ĥisi na kiela nakoena ĥarera re laa sane.”

Letano tai mla kiena kururu varu pan Ntewa

Luk 21:1-4

⁴¹ Ana siraunia, Yesu naga pa laa lavisin yo naĥa akuan ke varu ea e Yuma Wa nene, ana kira pisulili ke yar lala naĥa akuwakuan ke kiela nalaena lala. Naga pisu yar la moki naĥa kiela sur la mokliu, aĥar kiela nalaena kerkeviu la pimi, akuwania.

⁴² Ana ĩisi na pisu mēna sira marua tai pimi, naga letano tai, pe kiena sur re poli. Ana naga mla narin kururu varu lua pimi, mla pan Ntewa.

⁴³ ĩisi na Yesu pio kiena nalogena lala vena aim puna, naga pis pan la, pisape “?Amiu apisu ke sira marua nene, naĵa kuan narin varu lua ga nene? In na nevisa ve lelaga van amiu, naga mla keviu taulu make nalaena punu ga naĵa yar la naĵa kiela sur la moki amlavia.

⁴⁴ Lala nene, kiela varu keviu paĵisi, ana amla ga komĵas tekak ga pano, ana letano nene, narin varu naĵa naga mlararia vena iilaena kiena malena, mla punu ga pan Ntewa.”

13

Yesu pisawal naĵa ĩisi na awe plan Yumā Wa Mana ne Ntewa

Matiu 24:1-2; Luk 21:5-6

¹ Ana Yesu molue e Yumā Wa mēna ne Ntewa, ana pogos naĵa naga sumā mial pa ke, kiena nalogena lala tai kilologia pupia yumā lala na Yumā Wa nene, pisa sape “!Navianena, ovisuia! ! Yumā la nene amio kana kilavaru lala apo paĵisi wa!”

² Ana Yesu pisa pania, pisape “?Opisu ke pupia yumā la nene? Yumā la nene, ĩisi na taĵatete si kana kilavaru ne tai naĵa tomā ga towawa ruru teke e lelana, komin ĩisi na yar laĵas aimi, awe plan make nena yumā la nene vano.”

Naloge viowaena monar imi

Matiu 24:3-14; Luk 21:7-19

³ La amial sanene, apim e Kunus Na Purolip lala, naŭa kira pisu ke Yumŭa Wa, ana Yesu totano e yo nene. A pogos naŭa pe yaru taŭena la asu re poli, kiena nalogena la vari apimi puna, Pita, Semes, Yoane amio Antru. Ana apiun tania, asape

⁴ “?Pisi na awe plan Yumŭa Wa nene pogwai, a kile ya ne yoko kila sur la nene vim kakate?”

⁵ Ana Yesu pisataŭe la narui, pisape “Popon amiu avisuar ruru amiu, vena ve yaru imi visa kotalia amiu re,

⁶ vanon naŭa ŭisi na yaru la ve moki naŭa ala kiau kia, ana aimi avisave ‘In na nepe Navisaarena ŭa,’ ana ŭisi na aure yaru la ve moki ava ave wowe.

⁷ Ana visae e pogos nene, aloge ņaagena na mara pimi ke lavisi, pona alologon pupia mara la naŭa sike perina, ana ve sinemiu kurkur manene re. Suri la nene monar imi kakate sumo, ana nanene na pe pe legien maro re poli na wa.

⁸ A ŭarin suŭe lala, yoko akila mara amio ŭarin suŭe taŭena lala, a purvanua lala yoko asuņalu akawela amio purvanua taŭena lala. A yo kar ga e yomarava nini, yoko yemninu vaŭisi, a pupia viso ņena, ana suri la nene, pe pe legiena maro re nene poli na wa. Ana suri la nene sa ga sira naŭa ņeŭena, naŭa sane mloge ŭesan ņasina mlaea vena waren sisi, ana pupia naloge viowaena naga pere na wa.

⁹ “Ana monar avisuar ruru amiu, sa ŭisi yaru la aure amiu ava e kiela kumali, pona e kiela yumŭa na lotuena lala, vena avis van amiu, ala

nakoena van amiu, pona awe amiu. Yoko monar aligan amiu ava asuñalu ase marana ne yerkaawa na purvanua vanon ga naña amiu ape kiau nalogena lala, ana e pogos nene amiu akilia avisawal kiamiu nalelagaena e inu e marala.

¹⁰ A lologena wo, yoko alologon va yolai la punu ga e yomarava nini sumo wa, p̃isi na sur la nene kilia imi m̃alivi.

¹¹ Ana visae la nene aim atarar amiu, aure amiu avano vena ala nakoena van amiu, amiu na ve asitom manene re avisave ‘?P̃isi na nevisa ya ne van la ne?’ Ana avisa ga visena naña p̃isi na Ninuna Wa la van amiu, memes ga e pogos na visena, vanon pe amiu re apis poli, komin Ninuna Wa ga naga vis e amiu.

¹² “E pog m̃arera nene, yoko yar kilia tañan yaru viowa tañena la aimi aurelua wenla ruru naapo pona narila ruru naapo, vena awe moñar la, nanene komin naña la nene amlelaga e inu. A nin sisi m̃ena ga lala akilia asuñalu avisawal anela lala amio arimala lala naña la amlelaga e inu, vena lala m̃ena ga amare sanene.

¹³ Ana yoko yaru la sinela kar manene amiu, naña kiau kia teke e amiu, a amiu yaru a naña suñalar m̃arera suña ga vano-o pog m̃arera nene p̃isi, Ntewa tamalia naga.”

Pupia pog m̃arera tai garu Yerusalem

Matu 24:15-28; Luk 21:20-24

¹⁴ Ana Yesu pisa m̃ena ga visena tañena tai, naña popon yaru kilia wuloyuia, vena kilia ruru kana kinasia. Visena nene sanini, pisape “Yoko

amiu akilia avisu naña avisirlua nono tai naña piowa manene laa, yoko sum̃alu se e yo wa tai pe pon re nena naña aligan se ea. A pogos naña avisu suri nene, amiu naña asike Yutea, popon amiu aure, ava atapolou e kunus lala.

¹⁵ E pogos nene, visae yaru tai va ruru teke vanua lavisin m̃ana yuñã, naga monar ve va re si loyuñã war kiena suri laḡasia,

¹⁶ pona visae yaru sike e kana lokove, naga monar ve vito re si uñã tar m̃ana kulsota, naga monar kiriri vitaḡili ga sanene vano.

¹⁷ Ana e pogos nene, yoko viowa laa m̃ena van sira la naña meḡela, amio la naña amla ke yu pan kiela sisi tomtom lala.

¹⁸ Visae ve sanene, popon amiu alenwo amiu vena kiamiu pog naureena nene ve imi tol amiu re e pog na miava keviu.

¹⁹ Nanene vanon pogos nene, ḡisi na m̃arera na m̃arera, m̃arera laa sane taulu pogos m̃arera taḡena lala, naña siar e pogos naña Ntewa sii yomarava nini ḡimi tol nanagane, a yoko ve pog m̃arera re si tai ve sanene pogos tai.

²⁰ Ana Ntewa sitom̃al rui pisape yoko tero pog m̃arera nene imi ve plas ga, vanon kiena yeririna la naña pisir plan la vena ave kiena, asike e pogos nene. Ana visae ve tero re ve plas sanene, yoko taḡatete yaru tai kilia mal sike na.

²¹ “Ana visae yaru lala avivisa van amiu, avisave ‘Amiu avisu yaru nene, naga na Nav-isaarena nene,’ pona avisa taḡena, asape ‘Nane

Navisaarena ne nane gare,' ana amiu na ve aলেখা re e kiela visena lala toko,

²² komin naña navisaarena la mokliu naña pe ape leلaga re la poli, la akilia asuñalu, amio mña ga navisawalena navisokanena la ve moki, a ñisi na la nene akilia akila kile lala, amio sur nailanena lala. Ana yoko akila sanene, aure yaru la ava ave wowe, vano-o tol naña akilali naña aure mña yeririna kiena ne Ntewa la naña pisir plan la vena ave kiena, ana la tañtatete akilia akila.

²³ Ana akilia avisuar amiu rurua, komin nepisawal make suri la rui pan amiu nanagane, naña pe añarpo yo re poli wa.”

Pisi na Narin Yeririna wasuñe sina

Mak 13:24-27; Luk 21:25-28

²⁴ A Yesu pisape “Ana e pogos nene, siraun naña naloge viowaena nene ñisi, mrae imi ve pupumalko, a kupario ve tego re sina.

²⁵ A verue la ma e sinapane asuña aloloru, a suri mñarera lala nae ma e sinapane, yoko Ntewa kululun la.

²⁶ E pogos nene, ñisi na la avisu Narin Yeririna molue e lul amio pupia kiena namñareraena amio naurarena.

²⁷ Ana siraunia, naga ligan kiena navisi lala ava e yo punu ga e yomarava a ma e peni, ana yoko aure kiena yeririna la naña naga pisir plan la ñisi rui, aimi lele taaga puna.”

Pe yaru re tai naña kilia pog na legiena maro nene poli

Matiu 24:32-36; Luk 21:29-33

²⁸ Ana Yesu pisape “Amiu asitomli purlaki nene, naña asape purpiliva. Naga kiena sur navian amiuena tai teke ea, naña monar avisururuia. Pogos naña avisu sitos la siar miyunlua sina, imi memaena, ana amiu akilia asape pog na yepisusunu m̃arera pimi ke lavisi narui.

²⁹ Ve sanene, pogos naña avisu kile la nene e yomarava, la apimi akakate ke sa naña nepisa pan amiu rui, ana amiu akilia naña Narin Yeririna sum̃a ga e pulutava rui, lavisi ke kate narui.

³⁰ Nevisa suri na lelaga van amiu, yoko sur la nene imi kakate sumo, ana siraunia, lus kiena ne yaru la naña amal ke e pogos nene, p̃isi na akilia akovio e yomarava nini.

³¹ A yoko sinapane amio yomarava nini lalua m̃ena akovio veraga, ana kiau visena lala tařatete nena akokovio pogos tai.

³² Ana pe yar re tai naña kilia kana legiena pona aora nena naña p̃isi na Narin Yeririna m̃alivi ea. Navisi lala nae ma e peni, amio Narina ne Ntewa, la m̃ena amninue ga, ana Ata ga, naga taaga kilia.”

Monar akila ruru amiu asuñã ga

Matiu 24:42-44

³³ Ana Yesu pisape “Sanene, ana monar asuñã avisuar ruru amiu, komin amninue ga asape kiamiu suře naga imi sina e legiena ya.

³⁴ Sur nene sa naþa yar keviu tai mligan mñana uña vena vanon kiena pupia yalena tai. Sumon naþa naga ligan kiena yo, naga monar ligan kiena sur la punu ga va sike limana ne kiena yar na yuñæna lala, a monar vis ruru van la naþa apisuar ke mralæa, sape avisuar ruruia.

³⁵ Ana nanagane sa mēna nene van amiu, amiu mēna asumña avisuar ruruia, komin pe tekilia re poli, yar keviu na uña vim pogwai. Pona imi kotaþa, po kolemallo, pona sa lakaporo la akokoreko, po kolulagi,

³⁶ ana piowa ga naþa sa naga vim mñalivin amiu, lual naþa kam na amomalio mñaga.

³⁷ Ana visena naþa nepisa ke pan amiu, mesmesun naþa yeririna la punu ga monar aloge, sane amiu akirarava ruruia, avisuaria.”

14

Li nasumonena la nae Israel sinelan asape yoko aweñar Yesu na wa

Matiu 26:1-5; Luk 22:1-2; Yoane 11:45-53

¹ Ana þisi na, pog pimi lavisi naþa e kas punu ga asumña akila kiela pupia þaþægena lua. Legiena lua ga suwo ke wa, þisi na akila þaþægena na sitomñalen natamaliaena naga sumo, þisi na akila þaþægena na kanen kiligaþe naga sirau.

A e legiena nene, þarin yar wa lala, amio navianena na visaluaena la sinelan ke asape yoko aweñar Yesu na wa, ana akale ke mrapa tai na tarwanen naga.

² Ana lala apisayu ke pan la, asape “Sur nene tařatete tekila e maran yeririna la nařa apimi e řařagena nene, komin visae pere na la sinela kar ita vařisi ne, yoko akila pupia m̃aagena, vanon la mokliu nařa akekaran ke pa yar nene rui.”

Maria taron ponotaninu e Yesu

Matiu 26:6-13; Yoane 12:1-8

³ Ana e pogos nene, Yesu sike e kumali nařa Petani, naga sike e yuřa m̃ana yaru tai nařa apio ke Saemon Leperosi, komin nanua susumo naga řar leperosi se e yepena. Ana Yesu kinana ke e yuřa nene, sira tai pimi puna, mla piawi tai nařa amiyuřaen e kilavaru tai nařa po, a piawi nene na pulen ponotaninu nařa amiyuřaen e was nen řeligalaki tai, nařa kana kilavaru keviu pařisi. Ana sira nene pilonpo gon piawi nene, taron make ga ponotaninu nene taroi e řarina ne Yesu.

⁴ Ana lařas nařa asike e lele nene e pogos nene, apisu ke sur nene, ana la sinela kar sira nene pařisi, asuřa apisamumun ke pan la, asape “? Komin yar ne sira nene taron kare korenan ke ponotaninu sa nene?

⁵ Visae wilwilinlua ga na, vera war varu keviu ea, vena iilaena yeririna la nařa pe kiela sur re la poli. Naga kila kare na!” Ana la asun apisa kare ke sira nařa sanene.

⁶ Ana Yesu pisa pan la, sape “?E, kam na akila ke sanene pan sira nene komin ya? Amiu na ve avisa kare re si naga, naga kila yuřaena nařa po tanea pan inu, pisa ruru inu pařisi.

⁷ Li na lima korena la naña apisa la ke ne, yoko lala asulue ga likan amiu, ana amiu akilia aiila la silaga e pog punu ga naña sinemiunia. Ana inu, in na yoko ve nesu re silaga nemio amiu.

⁸ Suri naña sira nene miyuñaenia, naña taron ponotaninu e inu, naga kila sur wo punu ga naña naga kilia kila, naña pe nakilaruruen yepeu yoko neva e marena.

⁹ Nepisa ke sur na lelaga pan amiu, e yo punu ga e yomerava wetelu naña avisawal kiau lologena wo ea, ana asunyu mēna sur nowo nene naña sira nene miyuñaenia, vena asitoñal sina ga silaga pupia sitomena kiena e inu, naña sinena miye inu lelaga.”

Sutas ñiliwilin wan Yesu

Matiu 26:14-30; Luk 22:3-20; Yoane 13:21-30

¹⁰ Ana Sutas nae Kariot, naña naga mēna pe nalogena na lualima taaga pa lua tai, naga sitom ke pa rui naña yoko wilwilinwan Yesu, ñisi na pa pisu ñarin yar wa lala.

¹¹ Ana pogos naña amloge yoko naga kila kiela mrapa na tarwan vinaunen Yesu, akekaran pañisi, apisaar pania, asape “!E po pañisi ne! Visae oiila imimi ve sanene, yoko mela narin nalaena tai van ko vanonia.”

Ana e pogos nene, Sutas siar kale ke pulmas tai yoko kilia ligan Yesu va e liman yaru wa la nene.

Yesu pitetalia Pita amio Yoane ava akila ruru kana kinanena maro

¹² Ana legiena ñesia na ñağagena na kanen kiligağe pe Toste, naga legiena naña la asuña akila ke nakuñaena e narin sipsip lala vena

sitomãalena natamaliaena. Ana nalogena la apiun tan Yesu, asape “?Ko na sinomãan osape mekila ruru kata kinanena na ãpaãgena naãa e lepas nape?”

¹³ Ana naga pisa pan lalua, sape “Ava gar Yerusalem, yoko alual yar tai kus ke pupia piawi na wii tai, imi m̃alivin amiu. Ana ataveve naga avano,

¹⁴ ana yoko naga were amiu ava e yuãa tai. Ana pogos naãa ava loyuãa e yuãa nene, amiu avis van ãar na yuãa nene, avisa sanini asave ‘Kieta navianena piun ke sape awa yo kiena ne wolawa lala, vena naga memio imimi kiena nalogena lala mekilia makan kinanena na sitomãalen natamaliaena ea?’

¹⁵ Amiu avisa sanene vania, ana naga vian amiu e pupia lele tai metava van amiu, naãa suri la punu ga sike pa e rui, ana yoko akila ruru sur la punu ga nakanena e lele nene.”

¹⁶ Ana Yesu pisa sanene pan nalogena lua nene, ana apano, amial m̃a apa atol Yerusalem. Ana e pogos nene, sur la punu ga pimi m̃alivi sa ga naãa Yesu pisayu susumo pan lalua.

Ïisi narui na, lalua akila ruru maron kinanena na ãpaãgena nene kana Yesu, ãisi na aãasuãela sina ga.

Yesu pisawal naãa yoko Sutas vielua naga van kiena nasinekar lala

¹⁷ Ana kolemallo, Yesu amio kiena nalogena lala apitom garo Yerusalem, apito e yuãa naãani.

¹⁸ Ana pogos naãa asuãa akinana ke narui, Yesu pisa pan la, sape “In na nepisa ke pe lelaga pan amiu ne, yoko amiu yaru ga tai yoko vielua

inu, amiu yaru ga tai naña ita tesike tekinana ke veraga nagane.”

¹⁹ Ana nalogena la amloge naña naga pisa sanene, ana amloge piowa pañisi, apiun veve ke tan la peve taaga, asape “?E, in re poli?”

²⁰ Ana Yesu pisatañe la, sape “Naga naña yoko kila sanene van inu, naga pe kiau nalualima ga taaga pa lua tai, naña naga yaru tai naña imimi lua meputon kamimi kilaparavi e ga e pulpiala taaga.

²¹ Ana yoko Narin Yeririna naga monar mare sa naña Nasiriena Wa pisayu pa sumo rui. A yaru naña vielua naga, yoko viowa manene laa van naga, naga popon manene sa ve vaeme re ga rui.”

Kinanena maro

²² Ana pogos naña la akinana ke sanene na, Yesu mla kilaparavi tai, pisa potena pan Ntewa, ana kawewowaia, kian pan la, ana naga pisa pan la, sape “Alavia, akania; nanene naga pe tasneu.”

²³ Ana ñisin nene, mla piala na kuruta, pisa potena pan Ntewa, ana kian pan kiena nalogena lala, ana la punu ga peve taaga amunpae ea.

²⁴ Ana naga pisa pan la, sape “Nanene, naga pe tau naña pe nakilaen naviranarena kiena ne Ntewa sumalu ñarera silaga, naña yoko tau nene naga lauwo malena kiena ne yeririna la ve moki.

²⁵ Nepisaar ke pe lelaga na pan amiu ne, nesape yoko sane in na ve nemun re si kuruta pogos tai, vano vano-o nemun ga kuruta viu e navesuñenena kiena ne Ntewa.”

²⁶ Ana pogos naña Yesu kila pa sanene, ana la amiyau e yauena tai naña teke e tusi kiena

ne Yauena lala, p̃isi na amolue petan yo nene, amiyal apa e Kunus Na Purolip la.

Yesu pisawal sape yoko Pita naga visawan naga

Matiu 26:31-35; Luk 22:31-34; Yoane 13:36-38

²⁷ Ana pogos naṗa asike e kunus nene wa, Yesu pisawal pan la pisape “Pane ga kolemallo, kiamiu lelagaena e inu naga loru, komin Visena Wa pisawal pa sur nene rui, naṗa sape ‘Yoko in na nowe moṃar yar navisuaren sipsip, ana kiena sipsip lala yoko aureure tetai.’

Sek 13:7

²⁸ “A pog naṗa netaulu si marena, yoko in na nesumo neto garo Kalele, ana amiu ṃena monar asirau atom garo lele nene.”

²⁹ Ana pogos naṗa Pita mloge visena naṗa Yesu pisa pania, pisawolia pisape “Pona nalelagaena kiela punu ga nene e ko loru, aure vetan ko, a yoko inu, in na taṗatete neligan ko pogos tai.”

³⁰ Ana Yesu pisa pan la, sape “Lelaga nepisa ke pan ko, yoko p̃ane ga kolemallo, pogos naṗa towa la ve akokoreko re yam ve lua wa, a ko, ko na yoko ovisawan inu yam ve telu rui.”

³¹ Ana Pita pialuṗar visena nene, pisaar ṃarera, sape “Visae la sinelan asape aweṃarnu ṃena nemio ko, naga pogaga ne, ana inu, yoko taṗatete nevisawan ko, nesape in na pe nepe kioṃa re poli.” Ana e pogos nene, nalogena punu ga la apisa ṃena sa nene.

Yesu pa mlen ma Ketsemani

Matiu 26:36-46; Luk 22:39-46

³² Ana sirau, Yesu lala apa e lepas nen kunusia, amiyal apito tano e narin pulḗalu tai, naḗa kiena ki Ketsemani. Ana naga pis pan la pisape “Amiu asuḗa e nini wa. Ana in na neva nelen ve plas ga wa.”

³³ Ana naga ḗere Pita amio Semes a Yoane, ataveve naga, apa li la vitokak ga sane, ana e pog nene, sinena Yesu naga pimi urmi keviu, mloge piowa paḗisi.

³⁴ Ana naga pisa pa la telu nene, pisa pisape “Nanagane, nemloge sa naḗa ninuu naga poro-rowa make ga, naḗa lavisi nemare narui. Awis, amiu asuḗali atavilo amio inu e yo nini wa.”

³⁵ Ana Yesu miyal pa laa sane, mlorun kinai, mlen pa arimana, sape “Ata-o, Ata-o, sa otaḗania, yoko aora na pog ḗarera la nene naga ve imin in re sina.

³⁶ Ko na okilia okila sur punu ga, ana nepiun tan ko vena okuslua piala naloge viowaena nene vetan inu, vena in na ve nemun re ea. Ana ko na ve okila re sa naḗa na sinenanena kiau, ana okila ga sa naḗa kioma nasinenanena.”

³⁷ Pisi na, naga pimi sina ga puna kiena nalogena la telu naḗane, naga pisu lala amomalio pa rui. Pisi na lala atavilo sina ga, ana Yesu pis pa Pita sape “?Sanape Saemon? Ko na omomalio? ? Komin ya ne kam na taḗatete atavilo amio inu e aora nini?

³⁸ Kam na monar avisuar ruru amiu, monar alen lue ga, vena nataḗaliena la ve akila amiu aloru re e mlamulena viowa. Pe lelaga, kiamiu sitomena ḗarera po, ana tasnemi naga miyowa ga.”

³⁹ Ana siraunia, naga pa si e yo na leniena nañane, mlen, mlenin sina ga visena nañane.

⁴⁰ Ana pogos naña naga p̄asuñe sina, pisu la telu nene amomalió ke sina ga, komin atekavito pañisi, ana pogos naña pis pan la, lala pe apisatañe re si suri tai pan poli.

⁴¹ Ana naga pavin sina, kiena leniena na telu, ana pogos naña p̄asuñea, naga pis pan la, sape “! E! ?Amiu apa ruru amiu ke ga wa, amomalió ke ga wa? !Poga, p̄isi ga ne! Naga ne lavis ga pog naña narin yeririna va e liman li viowa la narui.

⁴² Ko pogaga, amiu asuñalu ita tetove, yar nawilwilin wan inuena, nagane pam ke lavis gar ne narui.”

Apuarar Yesu m̄arera

Matiu 26:47-56; Luk 22:47-53; Yoane 18:3-12

⁴³ Ana e pogos nene naña Yesu pisa ke visen nene wa, Sutas, naña naga tai lala lualima yam taaga pa lua ne, naga pimi, amio yeririna la moki naña añar ke playu na mara amio kiela plaki lala. La nene, yar keviu la kiena yar wa la, amio navianena na visaluaena, amio na sumonena kiena le Yu la, lala amligan la apimi.

⁴⁴ Susumon naña apimi, yar na wilwilinena naña Sutas, naga pisañes kile tai pan la sumo rui, pisape “Yar naña sa neva netalopan p̄esia, yar ne nanene naña ita sinetan ke, ana kiamiu yar na mara la monar atararia m̄arera aure naga vano.”

⁴⁵ Ana pog naña apimi narui, Sutas miyal mesmesun ga Yesu, pis pania, sape “Navianena, pokolemalo.” Talopania,

⁴⁶ ana kiela yar na mara la apimi atararia asape aure naga vano.

⁴⁷ Ana pogos naña atarar sanene, ana nalogena tai ðurelua kiena playu, sape te yar tai naña nae pun yar wa la, ana naga tetereria ga ðarina, telua kiligana komþas pano.

⁴⁸ A Yesu pis pan yar la nene, sape “?Sanape na amiu aþar kiamiu playu amio plaki lala? ? Sanape na asape aim ataranu sanene? ?Pona asitom ke asape in na nepe yar mñarera na vinauena amio na weñaren yaru la yo?

⁴⁹ Sila ga e legiena punu ga, in na nepian amiu e yumña mñana Ntewa, ana sanape na amiu pe apim ataranu re e pogos nene poli? Ana pogaga, kome sur la naña nasiriena wa pisayu sumo rui, monar imi ve sa ga nene.”

⁵⁰ Ana e pogos nene, nalogena la amligan Yesu, aþure petania.

⁵¹ Ana e pogos nene, yar mñee tai taveve ke yar la naña aþure ke Yesu pano, ana naga pitavi ga. Ana yar la nene ðasia apisuluþar naga, asape atarar mñena naga,

⁵² ana atarpal ga naga, atarar ga kiena kulmrae aþurelua petania, pe plamomñe ga kiriri pano.

*Aþere Yesu pa e pupia kumali kiena yar kerke-
viu kiena le Yu la*

Matiu 26:57-68; Luk 22:54-71; Yoane 18:13-24

⁵³ Ana lala aþere Yesu pimi sumal e marana ne ðarin yar wa, naña kiena ki Kaeþas, amio yar keviu kiena yar wa lala amio navianena na

visaluaena, amio na sumonena kiena ne le Yu lala, apim pa lele taaga e yo nene rui.

⁵⁴ Ana Pita mēna taveve mā Yesu e pogos nene, ana pe pa re lavisin poli, ana pogos naña apim loyuma e kove na kumali nene, Pita pa totano amio yeririna na yumaena kiena Kaeñas, lala atega ke kapi, komin miava.

⁵⁵ Ana yar keviu la naña asike loyuma e viorena nene, lala akale ke yar lañas naña akilia avisa plan sur lañasia naña Yesu miyumaenia pona pisa, vena kila la akilia awemār naga vanonia, ana pe aña re sur tai poli.

⁵⁶ La añal lañasia aņerela apimi apisawal visena moki, ana visena punu ga nene apisokan ga, asuma apisa ke ga sur la naña pe taņena lala, ana kiela visokanena la nene mlolor ga.

⁵⁷ Ana ĩisi na, lañas na visokanena añal visena tai, asumalu, asape

⁵⁸ “Memloge yar nene naga ĩarwar e visena sanini rui, sape pupia yuma wa naña kieta yermarua ga la amiyumaenia e limala, pisa sape yoko naga taaga ga kilia weplania, yoko yumaen ruru si yuma wa viu taņena tai e legiena ve telu ga, naña liman yeririna taņatete yumaenia.”

⁵⁹ La apisa mā visena la nene pano-o, kaka ga, kiela visena la nene pe sumal mārera re poli.

⁶⁰ Ana ĩarin yar wa sumalar se marala, pisi pa Yesu, piun tania, sape “?Ko na yoko ovisatame van la pona ve ovisatame la re? ?Sanape e visena la nene naña apisa plan ke ne?”

⁶¹ A Yesu pe pis re si po, pisatam̃e re si poli. Ana ãarin yar wa pis si pania, sape “?Sanape? Ko na ope Navisaarena naãa pe narina ne Ntewa, pona pe ko re poli?”

⁶² Ana Yesu pisatam̃e pania, sape “Ee, Navisaarena nene, naga inu. Ana nesape nevisa m̃ena van ko, ãisi na yam ve plas ga, avisu si Narin Yeririna naga totano ke e lepas na ãamarua puna Ntewa na m̃areraena, yoko avisu naga vaeme e lul metava vitom tano e yomarava nini.”

⁶³ Ana ãarin yaru wa sinen karia na pitolwowa m̃ana kulkota, pisape “Pisi ga ne! ?Komin ya ne ita takale ke si yar taãena naãa kilia visa plan si sur laãasia e naga?”

⁶⁴ Amiu amloge ke ne! !Yar nene naga ãarnena kare pa kia wa kiena ne Ntewa rui! Viorena sitom sanape, yoko tela naliãereena van ve sanape?”

Ana la amla naliãereena pa Yesu, asape memes ga naãa monar awem̃aria.

⁶⁵ Ana laãas aplasirkon naga, apiwo kilamara, ana asuia, apisa karea, apiuyun tania, asape “?E, ovisalia, ane mlipa ko ke nanagane?”

Ana yar na mara laãas kiena ãarin yaru wa la apim aãurelua naga petan yo nene, ana la m̃ena nene asuia, amlilipa ke pogos naãa aãure ke naga apano.

Pita naga pisawan Yesu

Matiu 26:69-75; Luk 22:56-62; Yoane 18:15-18,25-27

66 Ana e pogos nene, Pita sike loyuña e kove wa, ana sira na visuaren yumã mñana ãarin yar wa pimi e lele nene,

67 ana mñal Pita tegan ke kapi, pisuluþaria, pisa pania, sape “!E, ko nene ko mñena otataveve yar nae Nasaret naþane!”

68 Ana Pita pisawan sur nene, sape “!E! In na pe nemloge ruru re sur na ko opisa ke ne poli!” Ana naga petan lele nene, pato laa lavisin pupia pulutava na yumã nene.

69 Ana e yo nene, sira nene naga mñal sina, ana pisawal pan yar la naþa asike ne, sape “Yar nene pe yar kiena ke yar naña tai narui.”

70 Ana Pita pisawan sina ga visena nene. Ana pe piavi re nenaga, la nene apisa pa Pita, asape “Peraga, ko ke tai narui, komin ko na yar nae ke Kalele tai narui.”

71 Ana Pita pis mñarera, pisaluþar mñarerania e visena sa nini, sape “!E lelaga kemua rui, Ntewa na Mava, in na nepisa pa rui, pe nekiliaar re nena yar na kam na apisayu ke ne poli.”

72 Ana veraga ga pogos naþa Pita pisa ke sanene, towa kokoreko yam lua narui, kila Pita sitoñal si visena kiena Yesu, naþa pisa pania, sape “!Lelaga nepisa pan ko, ãane ga ne kolemallo, pogos naþa towa ve kokoreko re na yam lua poli wa, ko na ovisawan inu yam ve telu rui.”

Ana Pita mloge sinena piowa na piowa, molue pa vanua, tag na tag.

15

Lala aþure Yesu pa puna ne þarin suþe kiena ne le Rom la naþa sike Israel

¹ Ana kolulagi e Praere nene, li kerkeviu la kiena le Yu la apiora sina ga e kiela pupia kumali. La nene nane yerkawa kiena ne yaru wa lala, amio kiela nasumonena lala, amio kiela navianena navisaluaena la. Apis mña pano-o, atol sitomena tai, þisi na apiar limana ne Yesu, aþure naga pa puna ne þarin suþe keviu Paelat, ana la amligan Yesu e limana, vena naga liþerea.

Yesu suñalu e marana ne Paelat

Matiu 27:11-14; Luk 23:3-5; Yoane 18:33-38

² Ana Paelat piun tan Yesu, sape “?Ko ope Þarin Suþe kiena ne le Israel lala, pona peraga?”

Ana Yesu pisatañea, pisape “Naga ke narui, sane opisa ke ne.”

³ Ana yerkawa lala kiena ne þarin yaru wa lala apisasawal suri la e Yesu, asape naga kila sur la moki naþa piowa.

⁴ Ana Paelat piun sina ga tania, sape “?Sanape, la apisa suri viowa moki e ko rui, ana ko na omla mña kana navisatañeena pona peraga?”

⁵ Ana e lepas nen sur la ne apisa ke ne, Yesu pe pisatañe re si sur tai pan la poli, ana Paelat sinen pulan sur nene paþisi.

Paelat tañan pisape Yesu monar mare

Matiu 27:15-26; Luk 23:13-25; Yoane 18:39-19:16

⁶ Ana e pogos nene, la asike e pog na Paþagena na Sitomañalena Natamaliaena wa, ana e kas punu ga e paþagena nene, þarin suþe nae Rom silaga

kila suri tai pan le Israel lala. Naga kila naña visae lañas naña asike e yuña naloge viowaena, la akilia aviun yaru ve taaga naña sinelania, yoko Paelat naga ligan lua naga molue.

⁷ Ana e pogos nene, yaru na kilaen politik tai naga mēke e yuña naloge viowaena, naña yaru la akilia ruru naga, kiena ki Parañas. Naga pe yar tai pogos naña asuñalun kawelaen amio le Rom lala, mēmoñar lañas amare, ana amligan pa e yuña na loge viowaena.

⁸ Pisi na, pñina lala apimi moki lele taaga e marana ne Paelat, apiun tania vena naga kila van la sa naña naga suña kila ke ne, monar ligan lua lala yar tai naña sike e yuña naloge viowaena molue sina.

⁹ Ana Paelat pisatañe la, sape “Pogaga. ?Amiu sinemiun asape neligan lua yaru nene molue sina, naga pe kiamiu pñarin supe amiu le Yu la?”

¹⁰ Paelat piun sanene, vanon naga kilia pa rui naña yerka wa ga kiena ne le Yu lala, añure Yesu pimi puna, sane yuñaena na vielueen ga, vanon naña apisu kiela yeririna tañena lala akekaran Yesu pañisi.

¹¹ Sanene narui, Paelat sinenan sape ligan lua Yesu vano, ana yerka wa kiena ne yaru wa lala akila kare sitomena kiena ne yeririna lala pimi pisusun pañisi, asape añareran van Paelat vena ve ligan lua re Yesu, ligan lua ga Parañas vano.

¹² Ana Paelat mloge ke sur la naña apisa ke pania, piun tan la, sape “Pogaga, ana visae sanene, pñisi na nekila ve sanapen yar nene naña amiu apio ke naga asape pñarin supe kiena ne le

Yu lala?”

¹³ Ana la punu ga apioyonia, asape “!Asuar naga e lak torovia!”

¹⁴ Ana Paelat piun tan la, sape “?Vanon ya? ? Naga kila suri ya ne piowa?”

Ana la apioyoni manene laa pa metava sane, asape “!Asuar ãa, asuar ma e laki torovia!”

¹⁵ Ana Paelat pisu ãele narui, sinenan sape visa sur tai naãa kila yeririna la nene aloge wonia, ana naga sape Yesu naga sumãa ga, a mligan lua ga Paraãas pa si pula. Ana mligan Yesu e limana ne kiena li na mara lala vena akoa, aure va asuar e lak torovia.

Li na mara lala akila lele kare Yesu

Matiu 27:27-31; Yoane 19:2-3

¹⁶ Ana li na mara lala atarar Yesu aãerelua pa vanua e yometava na kumali kiena ne Paelat nene, ana la apio pa kiela ãegas nen li na mara taãena lala vena aimi avisuia.

¹⁷ Ana la amiyenlua mãana kulsota, ana amiyen kulkota tai e naga naãa marana mene sa naãa ãarin suãe la amiyen, ana aãar nonos nen kilsirili, ana aãaniroron ga, amligan e ãarina, sa naãa karo na ãarin suãe tai.

¹⁸ Ana pogos naãa amligan sur la nene e ãisi, la asumãa akila lele kare ke, asape “!ãarin suãe kiena ne le Yu lala-oo! Imimi mepatanon ko, memieluar ko!”

¹⁹ La amla lakiavio tai, amãe ãarina ea, la asumãa apasiria kare naga, akinai tano puna sa naãa apatanon ke naga.

²⁰ Ana pogosia naãa la akila lele kare naga, ãisi na aãarlua kulkota mene nene petan naga, ana

amiyen si m̃ana kulsota tai ea, aṗure apano vena asuar naga e lak torovia.

Asuar Yesu ma e lak torovia

Matiu 27:32-44; Luk 23:26-43; Yoane 19:17-27

²¹ Ana pogos naṗa li na mara la asumon Yesu apa ke narui, aṃal yaru tai naṗa naga pa yom̃arua ana naga mial pimi. Yar nene, naga Saemon naṗa sumo naga nae Saerin, naṗa naga arimanane lalua nene Aliksanta amio Ruṗas. Ana aṃareran pania asape naga towe kus lak torovia kiena ne Yesu vano.

²² Ana lala asumon Yesu apa atol kunus tai, kiena kia Kolkota, naṗa kana kinasa asape yo naṗa sane puryu na piaṗarin yaru.

²³ Pogos naṗa apimi aporu e wos nen kunus nene, ana la sinelan asape ala kuruta namunena va Yesu vena munia. Ana kuruta namunena nene ataron was nen suri tai naṗa melkalka sike ea, vena kila tasnena ne Yesu kapulu ga, ve lae manene re, ana pogos naṗa amla pania, yepen mavin munena.

²⁴ Ana la atarar Yesu, asuar naga ma e laki torovia. Pisi na, la akuan taes, vena alual li ane war m̃ana kulmrae tai, a ane war tai.

²⁵ Ana pogos naṗa amligan pa Yesu ma e laki torovia, naga kolulagi, maran mrae ovari.

²⁶ Ana li na mara nae Rom la asiri navi-sawalena tai, naṗa pisawal suri naṗa nasumonena kiena ne le Yu la sinelan asape awem̃ar naga vanonia, naṗa sape “Yaru nene naga pe ṗarin suṗe kiena ne le Yu lala.”

²⁷ Ana e pogos m̃ena nene, yar navinauena lalua, asuari la m̃ena ga e laki torovia sa ke Yesu, apisirilua tai e lepas na p̃amarua, taṓena e lepas na p̃am̃eli.

²⁸ E mrapa ne nanene, lala akila visena marua tai na Tusi Wa pimi kate sina ga, naṓa sape “Amligan naga m̃eke amio yar na kilaroen navisaluaena.”

²⁹ Ana yaru la naṓa asuṓa amiyaloro ke apa e yo nene, asisilin p̃arila, apisalele kare ke Yesu p̃isa, la asape “!Koe, suwala! Ko nene nanua sumo ko opisa osape ko okilia owe plan Yuṓa Wa m̃ana ne Ntewa, ana ovisirlua sina ga e legiena ve telu ga, ana sanape narui?”

³⁰ !Pon ko ga otamalia ko lia, ovetan laki torovia naṓa, otom tano!”

³¹ E p̃elaga m̃a nenaga nene, yerkawa kiena ne p̃arin yaru wa lala, amio navianena na visaluaena, asuṓa apitalia kare ke naga paṓisi, asuṓa apisa ke, asape “!Pona naga tamalia m̃a yaru taṓena la moki rui, ana naga mninue kare si narui, taṓatete si tamalia naga yo!”

³² ?Ana naga pe kieta Navisaarena, a pe p̃arin suṓen ita le Yu lala, pona peraga? Popon naga vitom tano e lak torovia nanagane, vena ita tevisu sane naga pe lelaga, vena telelaga e naga.” Ana la lua m̃ena naṓa asuar la e laki torovia amio Yesu, la m̃ena ga amiyakol sina visena viowa kiena ne la nene pania.

Yesu mare

³³ Ana kolipae ga, yemalolo pimi kalo yo punu ga e yo nene, pano tol mrae telu koyepakilavi.

³⁴ A e pogos nene, Yesu mlokai keviu e kiena visena ruru naapo, sape “?Eli, Eli, lamña sařatani?” nařa kana kinasia sape “?Kiau Ntewa, kiau Ntewa, sanape na omliganu nemēke sanene?”

³⁵ Ana yeririna lařas nařa asumālu asike e yo nene, apisusu suri la nene, ana amlogepal māagena kiena ne Yesu nene, ana la asape “Amloge ke ne, yaru nene pio ke yermarua Elaisa, vena imi iila naga yo?”

³⁶ Ana veraga ga, lala yaru tai kiriri pimi, řar lumlum řasia, taron kuruta namunena nařa melkalka pa ea, miyurar te laki tai, kian pa Yesu vena munia, řisi na naga sape “!Tesu wa! Tevisulia, pona yoko yermarua Elaisa vitom tamalia naga pona pere.”

³⁷ Ana Yesu mlokai manene sina, řere maron kiena yalua, marřanu.

³⁸ Ana pogos ke ga nene, pupia kulmrae nařa merorol tamalele ke e Yumña Wa mñana ne Ntewa, nařa mono ke yo wa nařa pe yo wa pařisi, purřa pito ga lika, siar metava pito tol tano.

³⁹ Ana yerkawa kiena ne li na mara lala, nařa pisusuar mña Yesu, pogos nařa pisu řere maron kiena yaluaena, milan pařisi, pisa sape “!Aulai, yaru nene naga pe Narina kemua Ntewa lelaga nařane!”

⁴⁰ Ana sira lařasia nařa atataveve ke Yesu asike e yo nene, asumālu asike laa perina sane, asumña atamaren ke kiela navianena. E lala nene,

la telu naña kiela kia la sanini, Maria tai naña sira nae Maktala, Maria mēna naña anenane Semes kokan amio Yoses, a sira mēna tai, Salome.

⁴¹ Naga lala naña pogos naña Yesu sike garu Kalele nanua sumo, la asumña ataveve naga, ami-ila mēna naga. Ana sira mēna la moki asumñalu asike e pogos nene, naña lala mēna akom garo Kalele ataveve Yesu apa ma Yerusalem.

Yosop sin Yesu

Matiu 27:57-61; Luk 23:50-56; Yoane 19:38-42

⁴² Ana legiena na Praere, naga pe legiena na kilaruruen sur la punu ga sumate Legiena Wa peni, ana pogos naña lavis mrae vito tano,

⁴³ yaru tai nae Aramatia, kiena ki Yosop, naga pe marau re poli, kila kiena sitomena m̄arera po, pa suñalu se marana ne Paelat, piun tania sape kus tasnena ne Yesu. Naga m̄arera pan pañisi nakilaen ve sanene, komin naga pe pupia yar tai na kansel kiena ne le Yu lala, naña yar la akilia ruru naga po, pe yar mēna tai naña sinenan ke navesuñenena kiena ne Ntewa naga vim.

⁴⁴ Ana Paelat mninue ga sape e pogos nene na Yesu mare rui po pere wa, pio kiena yar kawa na mara pimi piun tania.

⁴⁵ Pogos naña mloge sape Yesu mare rui, ana tañan tasnena Yesu imi va Yosop.

⁴⁶ Ana Yosop temare ga m̄ana puluve viu tai ñisi ga na wa, pa pul kulmrae nowo tai, pa akuslua tasnena ne Yesu petan laki torovia, amluluwoia ana la apa amligan m̄eke e m̄ana puluve nañane. Ana amelilivin pupia kilavaru pimi mono pulusia, ana la añasuñe la si apano.

⁴⁷ Ana Maria lalua nene, tai naña nae Maktala, amio tañena nene anenane Yoses, lalua mñena apimi apisu yo naña tasnena ne Yesu mñeke ea.

16

Puluve korena ga mñeke

Matiu 28:1-8; Luk 24:1-12; Yoane 20:1-10

¹ Ana pogos naña Legiena Wa ãarovia, ko yepekilavi e Pog Orai, Maria nae Maktala, amio Maria naña anenane Semes, amio mñena Salome, la telu nene apito apul suri la naña ponos taninu vena awar va avilan e yepena ne Yesu.

² Ana e Sante kolulagi wa ke ga wa, sa naña mrae siar molue, la teloka amiyal apa e puluve nañane.

³ Ana pogos naña amiyal ke apano, apiuyun ke sina ga pan la, asape “?Ana visae tetol ma ne, ane kilia melilivin lua pupia kilavaru naña mono ke pulus nena van ita, vena tekilia teva loyumña?”

⁴ Ana pogos naña la apimi lavisin yo nene, apisu ga pupia kilavaru nañane, yaru tai melilivin lua pa rui.

⁵ Ana la apa loyumña e puluve nañane, amilan yaru mñee tai totano teke e lepas na ãamarua, miyen ke kulmrae naña miyuwowo pañisi, ana pogos naña apisuia, sinela kurkur, miyuyuwawa pano-o pañisi.

⁶ Ana naga pis pan la, pisape “!E, ve amarau re! In na nekilia pa rui naña amiu apimi e yo nini vanon Yesu nae Nasaret, naña amñear naga e laki torovia. Ana naga sumñalu mali si rui, pe

mon re si e yo nini poli. Aimi avisulia! Na nene yo naña amligan tasnena m̃enea.

⁷ Ana ato vilaga, avisawal va Pita amio nalogena tañena lala, avisave yoko Yesu naga sumo vito ðes garo Kalele, ana ðisi na la m̃ena monar asiraun atove, avisu naga e yo nañani, sa naña naga pisaar pan la sumo rui.”

⁸ Pisi na la apitañili, apetan puluve aþure apitove, komin la amilan suri la nene pano-o pañisi, amiyuwawan ga rui. Ana la amarau m̃ena pañisi, kila sanene la apitove na pe apisawal re si pan yaru tañena la poli, apa mesmes puna ne nalogena lala.

*Yesu m̃alivin Maria nae Maktala
Matiu 28:9-10; Yoane 20:11-18*

⁹ Ana Yesu mal sina e Pog Olua kolulag wa ke ga wa, naña pe legien ðesia na wik. Pisi na naga m̃alivin ke la naña atavevea, ana naga naña m̃alivin ðesia, Maria nae Maktala, naña nanua sumo pile plan ninuna viowa la olua petania.

¹⁰ Pisin naña Maria pisu Yesu, pa m̃alivin la naña asumã ataveve ke naga sumo, la asumã amloge ke piowa atag ke ga wa, naga pisawal pan la pisape Yesu naga mal si rui.

¹¹ Naga pisa ruru pan la pisape naga pisu Yesu e kilamarana rui, ana la pe amlelaga re e naga poli.

Yesu m̃alivin kiena nalogena la lua

¹² Ana siraun sina, e pogos tai nalogena la lua apetan Yerusalem amial apa ke apa sane, ana

Yesu m̃alivin la. Lalua apisu sane yepena pe taṓena, pe sa re si nanua sumo poli,

¹³ ana pogos naṓa apisu pae ṓisi, lalua apilon la sina aṓasuṓela, apitove apisawal sur nene pan lala taṓena lala, ana yam si tai lala taṓena la nene pe amlelaga re e sur nene poli.

Yesu m̃alivin kiena nalogena lala

¹⁴ A siraun sina, Yesu m̃alivin kiena nalogena la lualima taaga pa taaga, e pogos tai naṓa atotanon ke kinanena. Ana naga pisli m̃a pan la, komin naṓa pe aṓasine ruru re naga poli, komin sinela la m̃arera paṓisi, kila na la pe amlelaga re e visena kiena ne la naṓa akirawal naga mali si rui.

¹⁵ Ana Yesu pisa pan la, pisape “Nanagane na monar avano, aliureure amiu e yo punu ga e yomarava nini, monar alogon kiau lologena wo van yeririna la punu ga.

¹⁶ Visae yar tai naga loge, ana lelaga ea, siraunia tol wii nakeena, yaru nene yoko tol malena, a visae naga naṓa ve lelaga re, ṓisi na Ntewa visaar marena vania.

¹⁷ Ana la naṓa yoko alelaga, ṓisi na kile la asike e la, sa naṓa la avile plan yermare la e puriukawaena na kiau kia, ana avisin m̃ena visena taṓena lala,

¹⁸ a sa pogos tai auarar lom̃ara tai, ana yoko woga ga, a visae amun sur tai naṓa monar amarenia, ana sur nene taṓatete kila sur tai van la, ana yoko aligan limala la e inanena lala, ṓisi na aloge wo sina ga.”

Yesu ƣasuƣe si pa ma e peni

Luk 24:50-53; Yum̃aena 1:9-11

¹⁹ Ana pogos naƣa kieta Suƣe Yesu pisa pa visena la nene pan la, Ntewa ƣurelua si naga pa ma e peni, mligan naga totano e lepas na ƣamarua puna.

²⁰ Ana kiena nalogena la amial tetai, apa amlologo e yo punu ga, ana apisu sane Suƣe naga miyumũae ke amio la, kila ke kile la moki pan la, vena kilaen yeririna la avisu kilia sane kiela visena la pe lelaga ga.

A sunena nene maro ga e nene.

**Lologena Wo Kienane Yesu Kristo Kome
Kewo
The New Testament in the Lewo Language of Epi
Island, Vanuatu
Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

ee028e1c-7e53-571d-8041-681daaf580e8